

Edeke Loebarit Aitim

Phoenix, Arizona, U.S.A.

65-0119

1 Ipedorete aiboikin. Ajai eong...arai isikakina noi, alomun toma kosodi aanyun Onac Moore ka ngul kere kane kolutaari, ipapero luajen eong adaun ikar luipu, erai kaitebeikin arereng aanyun kes kane atibong na. Apupi eong aitudisiara aibwo kane kosodi einer kede itunga kwape kangul luisisiatos akiro nuka ediini kokauka, ido aticepak itetenaarete kesi eong kebuca eong. Amuno eong kwangin.

Iyalama oni noi atibong na ajaut kede icetunganan ne, Inac Rose. Ijai isio abunore...ajai eong kede Onac Shores kede ekatupitonike, lolo, kanuka ainyam luka apaaran. Ido korot kilosi, abu Onac William kolim ebe adeka Inac Rose noi. Kasodete isio alosit aanyun nges ipak edit, kakukokinos kwap. Ido ajaatar ngesi emusuja loekiara, ido odeka teni. Akiro adis bon nuka ailip, kosodi Ejakait ainerakin kasio, kosodi atemar, "Ilosi ngesi angaleun." Ebala, "Ebuni ngesi ajaun ngina akuar naka moi," ebalas. Ido ejai ngesi ne atibong na, iboie cut kane. Edolit ngin.

2 Inac Rose, kobwo ber ijo ipak edit, tetere kesi...Iyalama oni neejai Ejakait. Aenikina ngesi ojamu. Abu ngesi kotema atiar, "Abu a-ajokit kenomonoma eong kama ejai nginibore kere. Abunit eong ne ido abu eong abilakina eong kwap kede na," eiponece loka adek naka eporoto, kaceda. Konye ayangau Ejakait nges, aso kanuka ngun iyalama oni. Esialamukitos Ejakait lominat!

Kwana ijaun oni kede apakio nukajokak. Ido akuar naka moi, ilosi laiye Ramada. Ido mam imurwokini kwana, mam ebuni araun ne moi, ebuni araun Ramada. Ido egeun atukonokin akuar naetupakini. Ekoto yesi angirikin eong akuar adiopet bobo, ijeni ijo.

3 Aso akuar natubor abu eong alot neelwana noi awai naka aipimas, abu eong asub bala ainakini akaijar aisumunet ebe, adiopet naka ekaru, ebe alosi eong aitub Aisiranareta ngun anyoun kosawan iuni arai iwongon, isawan ikany, kiton aticepak nepetai idakikan akaisauni arai akaisaongon. Ido kwape kalimokinitor eong yes akuar natubor, abu akaberu kesialamik eong Naesabiiti, ebala, "Abu ijo kiswama ejok cut." Aso-aso do, ejena, ajai eong abunore akuar natubor kasodi amunaar ngin, itei ijo. Konye arai adakikan akaisakany ka lukany, aiboisit naka akaisauni, akuar natubor.

Nekejaar abunore lailo, atibong na, abu Billy kotema, "Nunyoeka bo ilosi ijo einer kotoma?"

Eong ebe, "Eebo, kijaar eong ikiro idis luiwadikatai ne, ka Nuiwadikaere ace. Mam eong ajeni, ace kotoma kakesi, Aisiranareta aongon arai akany nuegelegela." Eong ebe, "Apupi eong ebe kalot eong ngina, kasodi eong aanyun nuelosete ngaren."

Ebala, "Abu ijo kisumunikite ailipanakin itunga kere lukadekak."

Eong ebe, "Eebo, ipa. Akaadin bo amwaasi ai ijaatar ijo?"

Ebala, "Akwataarei."

Eong ebe, "Ejok eong aitegear kede ngun, atibong na."

Kosodi ngesi atemar atiar, "Kwana kiitu, ijaatar ijo idakikan itomon ka lukany kanu einer." Ebala, "Abu ijo itwasama kere akuar natubor." [Kokienete Onac Branham ka esipan-Ekewa.] Eebo ejaun oni aisuburikin, biai mam kereka eong esuburikini?

4 Eebo kipou esumunikisi yesi ebe ibuni ailipanakin itunga lukadekak luajaatar akaadin, ido itepesenitai isio-isio aitodolikin aisumunet ngin, ejena ngin. Mam ipedori ayangaun kes kere toma okokoro loka ailipanakinio, ido mam eong ti epedo karaida anyaraunun kes idopediopen, kotoma osipan. Karaida tikepedori Emoyo Lokalaunan ainakin eong ngin, mam eong apedori atitingikinin aswam ngin. Elangir ngin noi kamaka. Ido, konye oni kere ijeni iboro ngul. Ijeni ebe eroko Edeke erai Edeke. Mam erai ngin nges itangalei. Erai ngin nges bon edukuni aiyuun, kanu ainakin oni ajenun ebe-ebe ijai Akonyeneke.

Ido ilosi oni, atibong na, ailipanakin itunga lukadekak, nginidiopet kakesi yenejaatar akaadin ngun, ailipakinio. Kosodi do akaur naka moi, kalaije ko Ramada, ibuni aitam akorar ace bobo kasodete ageun ailipanakin kes kangina, naarai aroko eong ajaatar akuar naka moi. Ido aomit eong ebe kijaar eong akuar adiopet naka atukonokin, aticepak ainyam lukatupuruc da. Eyangaikini do eipone loelomunatar iboro.

5 Ejai ece, ediopet kotoma oinerak lomam abu kotakan cut; eroko etakanuuna da ber, mam eong aomit. Onac Humburg, arai bo erai ngol...[Kotemari onac, "Amburgy."-Ekewa.] Amburgy, Amburgy, Kash Amburgy. Aso ekamunit eong ngol-ngol erono, erai ngol ekiror lo German. Aomit eong-eong erai ngol lo German. Aso aticepak eraun eong aisub bala aburokini, kwape kinyaritor oni ngin, kitimitos alimunet ngin, kanuke.

Aso kijaun oni kede apak nakaumokin kotoma naka Ejakait, ejaas ngun da. Neejaas yesi kere, arai ejaas icepejok ne atibong na, abeit cut iyalama isio ajaun kayes toma, ido imuno ebe isirerengi Ejakait yes. Elipi eong ebe emameunete bobo itunga luedekasi kotoma aduketait kotoma apak nainyounia oni

atibong na, ebuni Ejakaitiwok aijesun kwap kotoma apedoriKe naepol ido ebuni aitangal kere luedekasi ka luisiriebitai.

6 Kane acepak kau, atapit eong ayanganar idiopediopen kanu aimor nepepe ka kes kanginidioper, ice kotoma ojautenesio luatioko lumam isio ipedori aitemokin. Kosodi adukun katipet noi, kiton neadolokina araun, abu Ejakait kinyikok aisirereng ngin, kiton nekidumunia akwatauni arai akwataongon kidaritos, ido aso do emusungunos aomisio nuka itunga naarai edarete kesi. Aticepak, kotoma apak ngin naepol, ejaun ijo aidar aticepak ekaru arai iarei, aso kanu adolokin toma ngin, itei ijo, kokiding naka ariamununeta, kanu ayangar kes aimor naitegelikina. Ido ipedori isio aiboikin kasodete aidareun Ejakait kiton nealimokina Ngesi isio cut ationis cut bec.

Emamei abunonokin ejaas itunga luiboiete kane atibong na luejaunar toma aimor naitegelikina. Bia ejaas? Kaanyutu yesi ikeunete akusikanin kuju. Kotoma aimor naitegelikina. Eebo, ejaas iboiete, aso, ido ejenete ebe abeit ngin. Ajai isio aidareun kanu aanyun nuelimuni Ejakait, nuarai ationis ngin...Kosodi do ajai eong aitobwoun ngun kane apak ace kau. Abu eong alimok Billy ebe mam oni ipedori aiyatakin it ajaut kede aimor nakaiyeiyea.

7 Itei ijo, eong-eong-eong aitub akaisaarei ka lukany napena, irwan nakiareit, ido ajai adokar aitenar irwan nakiuniet. Ido aso kwape kimojongia ijo, inyobo, mam ijo, ijo...Koiponece mam ijo ipedori ainyikokinit bala kwape atapitor. Euriakaros akonikeje. Ido-ido, ejena, mam Onac Moore ejeni ber idiobore yenikamunit ngun. Nges...Aomit eong ebe ijai isio nenice nepetai apolou naeriana.

Konye alototo akipi nuipu kwap ocilet anyoun neibunio ijo keong, ka Onac Brown ne irwana nasodit, kede Onac Outlaw Brown ka Onac Garcia, ka Onac Fuller. Mam eong ajeni arai epedorete itunga ngul kere kojaas ne atibong na? Onac Garcia, Onac Fuller, Onac Outlaw, yesi ijaas ne? Ikeutu akusikanen arai ijaas yes. Eebo, Onac Fuller ngol, acamunit eong, arai mam eong ebucarit. Onac Outlaw kalailo. Onac Garcia, acamunit eong-eong ebe abu ngesi konyou ko Phoenix. Aomit eong bala erai ngin abeit. Abu konyou ko Phoenix, ido ejai ngesi laiye California. Eebo, arai cut abeit apaarasia nuajokuka, ido iroko iyuunit Aisiraret ngepengin najaatar eong kapakio ngun, "Yesu Kristo ngopengol bian, lolo, ka ikar kere." Aomit eong bala erai nen nepetai...Eebo, arai Becky ikoku. Erai nen nepetai ikar itomon ka lukanykaongon kau.

Ido kwana erai ngesi apese nati, naetumit, naasilon iboie kokinga kangina kanenice, ikar itomon ka lukanykaongon lukapolou. Aibo ijai ijo, Becky? Esapat, edumuni ngesi eong kanuka ngun. Eitunit eong ebe adakit eong nges kakaninika. Abeit cut ti eraun eong epelu loepol aswam ngun atibong na.

8 Kiitutu kalaiye kokanisa Onac Garcia akuar adiopet, arai ngin ipese yenadit. Kasodi eong atemar, "Kijaar oni atukonokin naka akwap kere atibong na." Eong ebe, "Enera eong kotoma angajep naka asipanian." Kasodi eong atemar, "Akaberu na erai nako German." Eong ebe, "Erai eong etunganan lo Ireland." Kasodi eong atemar, "Kosodi ikapese erai nako India," ido arai ngin Becky.

Aso nealosio eong kinga kau naka ekek, ajai ipese yeniko Mexico kinga ngina, ebal, "Onac Branham!

Eong ebe, "Eebo, naminat, inyobo ikoto ijo?"

Ebala mam kereka ijo iwomit ebe ekwele ikonikoku mot, kanu araut nako India?" Ewasiara ngesi, ijeni ijo.

Kasodi eong atemar, "Erai nako India kotoma awamisio."

Eebo, iyalama oni, ebe, kanu ajaut ne bobo atibong na. Kwana eroko oni kidolokina Akiro, adolokis ber Nges, naarai erai Ngesi Akiro. Naitodiarere Akiro, erai Ngesi ngol kotomakon.

9 Kwape kipou kajaunotor akuar natubor Ikinyomit Yenegelara, yesi apotu kisialamikisi ngin, Ejakait isirerengi? [Kotemari atukos ebe, "Amen."-Ekewa.] Abeit cut esialamikit eong aynagaun Aisiraret mamakus. Ido iseseni oni nueraas ikinyom.

Kwana ejai ailipa naitegelikina atibong na, icebore yenitegelikina? Aticepak ice kotoma kayesi kere luilosete ajaun toma okokoro lo loka ailipakinio, ibalas ebe, "Edeke, kitimoi. Neabunio eong ailipakinio, ikeun aiyuunika kuju ariamakin kede ejautene." Ido-ido aticepak ejaatar icetunganan iminat, yenedeka, ka icebore. Ikeu akonikan kuju tetere Edeke engoliari kwap kosodi atemar...Kwana arai erai ebe...Mam ijo ijeni eipone loeinakina ngin eong aipup asesin ngina. Kosesen eipud kotoma kangina! Inacan lujaanakinak, kosesenata yesi ngun. Ianyu? Kwana, arai einakini eong aipup koipone kangol, inyobodo iswamaikini ngin Papawok? Abeit cut.

Kwana kelipa.

10 Lominat Yesu, ijai kwana isio adolokin Eicolong lokapolon loka aitim, kotoma Okiror lo loilosikina kere. "Naarai emamei Ekiror ece loijaikinitai kokiding naka itunga lloitarere isio, dimarai Ekiror lo loka Ejakait Yesu." Ido ibunit isio Kokirorike. Ido ilipi isio, Papa lokotoma Akuj, ebe ijauni Ijo isio, atibong na, kwape idweKon luiyuunito. Ido itim amamus aiyuunikosi, Ejakait. Kingarak ngin atibong na, tetere eraun ebe

iyuuni isio cut kere nginikirot naka Edeke atibong na, kanuka iboro kere luejai isio eipud.

Ijeni Ijo ibore yenejai akidingos naka akanin kanu nuikeunitai kuju; ejai adek, ace kotoma kakesi eticepak eraas atiokisio nuka okal, ace kotoma kakesi atosio nuka isirigin, ice kotoma kakesi itapasuna, aticepak ice ibiroro, ice ikadiakanaran. Nuerai eipud kere, ideparit Ijo noi kanuka lokasurup edio kere. Aso ilipi isio, Ejakait, ebe-ebe atibong na, ebe eimisiikini isio ebe lokasurupikosi, nginidiopet, adaun aipikor, karaida atwanare alopel. Ido ebe idaparit isio ikapikorok kotoma Ngol Loabu-Loabu Komin isio kijaikin da elopet kanukosi, elota da isio kotoma AokotoKe.

11 Kilipi isio, Ejakait, ebe amamus aiyuun kere, abunokin kere, aigurwokina kere, kere numam eraas Edeke, epote anyoun kamakosi atibong na, tetere Emoyo Lokalaunan ejaunos kede apedor naka ewai kotoma otauonokosi. Kinarikinos Ngesi kasio koipone kalo itegelikina. Kinerakinos Ngesi kasio kotoma apedoriKe. Kitajaru Ngesi ngul lu-luetwakito komoyo, kinyak angaleu neejaas ngul luedekesia ka luisiriebitai, ikeu akungin nuanonokata, akanin nualajakat nwegwegweunos kwap. Ido kojaun apak naka alakanar.

Kotakan ngin atibong na, Ejakait, anyoun aiboisit na naka ooteri loka Ramadan, kosodete aitegear adiopet kotoma atukonokineta nukapolok kakere nuibwaikintere kotoma oibuga kalo. Ejakait kwape kitukokinar isio nepepe kasodete ailip! Ibala Ijo ebe, "Arai etukokinos itunga luenyaraikinitai Ekakiror nepepe kosodete ailip, eirari Eong kotoma Akuj." Ilipi isio nu ajaun kwangin, atibong.

Kwana, Papa, kwape kisiomio Akirot, emamei idiopet yenepedori aijul ngin kidimarai Ijo, irai Ijo Ekejulanikon elopet, ido ilipi isio ebe ibuni Ijo aijulakin isio iboro luisiomi iso atibong na. Naarai ilipi isio Kokiror loka Yesu. Amen.

12 Irai ikotosi yesi luipu aigiranakin ikokoron luesiomi ejaanakinan. Ido akoto eong yesi, atibong na, arai ipedorete, apukor Ipeson.

Ido ajai eong einer Asabiiti natubor kotoma Opeson, eipone loaraar Eitabo ngol loka Yosua Ipeson luka Aitutuket Namojong, ka eipone loaraar Eitabo loka alakunio.

Ido ejaatar alakunio atutuben aarei nuegelegela: "Alomun kinga" ka "alomar toma." Nasodit ber, ejai ijo alomun kinga. Icetunga ekotos aupun kede akwap toma; konye ebeit ber ijo alomun kinga naka akwap, kanu alomar toma Kristo. Ejai ijo alomun kinga naka amamus aiyuun, kanu alomar toma aiyuun. Mam epedori ejaut idiobore toma orotokon. Kanu cut ajaut kede aiyuun nakabeit, ekoto ijo cut ajalakin nginibore kere yenengolopasi kede Akirot naka Edeke, kokau, kanu alomar toma aiyuun.

Ido arai ngol Eitabo loka Ipeson loka Aitutuket Namojong, Yosua. Neabu, Musa kobwoikinitor ekisil, ido mam apedori aitajar idiotunganan; konye apedori asianut, ido kane Yosua erai akirot ngipengin bala Yesu, "Yawe-eketajaran."

Ido kwana do, ianyuni oni ebe kidol oni neejai Ipeson ice, Ipeson ice kwana. Naeraar, ebe, kotoma odiininiwok lukacoa kaiceda, ka ainapetawok kere nuka asioman adolokisi toma Yorodanikec, aso ibusakinit oni ajaun kede Ipeson bobo. Ekoto oni ajaun kede anyoun, "alomun kinga" ka "alomar toma," kanuka Aupoorio

13 Kwana ilosi oni asiom atibong na kotoma esula lo 2 loka Ipeson. Ajai bon eong alimun ngun tetere yesi idolokinete toma aiboisit ngin, arai apukor esula.

Ido kitajaru yesi da, lukolo kitwakito kanuka akusibucanareta ka adiaakanareta da,

Nukolo kilosenenete kotoma, kwape ejaar eipone loka akwapin kanu, kwape ejaar ekapolon loka apolou naka apak, emoyo loiswamai kwana odwer luiulaka.

Kipou isio da kere kekonenenete nen kolo kotoma aingobel naka awatekosi, keswamaenenete nuekoto akuan ka aomisio, irai koinono idwe luka anyunyura kwape kaluce da kere

Konye Edeke loebarit aitim, kanuka akemin naepol nakiminar oni,

Nakitwakitor kanuka aibucanaretawok, abu kituluo oni ikajarak nepepe ka Kristo, (kitajarunitai kanuka asianut,)

Akoto eong alemun kanen adis, arai atutubet naka ekokoro, "konye Edeke," Edeke Loebarit Aitim.

14 Akoto eong ijo amisiikin kane nuka enabi, ekiyakia, atemas, Paul, lo-lo, abu kolim nuka nu, eipone, "Kitajaru yesi da, lukolo kitwakito, kitwakito kanuka aibucanaretakus ka adiaakanareta; kilosenenete kwape ejaar eipone loka akwapin, kismamaenenete nuekoto akuan, ka aitodol aingobel naka aomisio. Ngesi..."

Inyobo abu koyangau aijulakinet na, itei ijo? Ido inyobo abu koyangau ngin, "anyoun araut loitwanit

kapak adiopet," kiton aitajarunio? Aitajarun akepolou "ainakin aijar." Ajai aijulakinet, anyoun kotoma atwanare kiton Aijar. Emamei bobo ice, emamei bobo icebore yenedepori aismamaikin idiotunganan, yepol noi, kwape aijulakin nges anyoun kotoma atwanare kiton Aijar. Etunganan, arai ejai ngesi atwanare, kotoma akuan, ido arai epedorio nges aitangaleun kotoma akuan, eraun tin gin ibore yepol noi, konye emamei ibore yepol kwape netwanitor ngesi komoyo kosodi Edeke aitajarun nges toma Aijar.

15 "Yesi lukolo, apaarasia nuatuboros, kitwakito." Kitwakito yesi. Karaida luipu kane atibong na, epedorete angoliar kau kosodete ajenunn ebe atwakito kesi. Konye kwana inyobo mam bobo kitwakito atibong na, kwape kitwakitotor kolo? Ibecokina yesi ajaut koipone kangol, naarai kibu ijo korai ikadiakanaran, "konye Edeke Loebarit aitim." Iboro lu kere lukipou oni araas, "konye Edeke"! Nges abu kismawau aijulakinet cut kangina, "Edeke Loenbarit aitim"!

Oo, eyalama eong noi kanuka ngun, ebe Nges kwape eraar loebarit aitim. Korai Ngesi bon kobarite isirigin, korai bon Ngesi kobarite kotoma oboro, luebarit Ngesi, konye ejaas ngun da ibore yenapolon kakere nges araut loebarit aitim. Oo, erai bo lolo ngin akirot naepol biai, eipone loaraar ebe kitwakit kolo.

16 Ido ijai oni einer akuar kaya nuka eipone loebeitor ikinyomit kotwana. Ido idiobore kere yenejai toma ocokat ngin yenika aijar ibusakinit mere bon atwanare, konye aibos da. Arai mam ebosi, mama epedori aijar. Ido aibos nges, "alemmario cut kere awai; angetakin ngin." Ido kiton nekidolokina oni aiboisit naenyounia aijenewok cut kere ka aomisiowok ikulepek kosodete abosiar awai kamawok, kwangin epedori do icokat yenika aijar ageun aijar.

Kwana-kwana ipedori oni, apedori eong atolomun mot aisisanakin ne, namam eong...Arai mam ijo iyuunit ngin, mamace. Emamei ationis. Eyuunit eong ngin. Eyuunit eong ebe-ebe etunganan, nakeurunere nges toma akwap na, ebe nakeurunere ikonimukeru, auruun toma akwap, mam ti ijo ipedo ajaun ne korai mam erai aijen sek naka Edeke, naarai erai Ngesi loemamei ageunet ka esange ido ejeni iboro kere. Ido nakeurunere imukeru toma akwap, ejai icebore toma omukeru ngin. Arai elosi ngesi ajaun kede Aijar, ejai icebore toma ngina, toma okoku ngin, yenebuni ngesi toma, katipet arai ekaulo. Ejai ikinyomit ngin tomake. Kwana arai kiyanga ijo...Kitejenaritos Nuiwadikaere ngun kaidelal.

17 Kwana arai ijaatar ijo Aijar Namam Edaun atibong na, arai ijaatar oni Aijar Namam Edaun, akepolou kijaatar do oni ngin sek, naarai ejai eipone ediopet bon loka Aijar Namam Edaun. Kipou araas luijari sek. Ido apolou naijaria oni, naarai irai oni atutubet naka Edeke. Ido Edeke ngesi bon ibore yenimam Edaun.

Kwana bala kwape abu Melukisedek kodumuna idiopet kotomon kama ejai Aburaam, ido aponi kimarakinai neejai eketatait Lebi, yenaroko ejai toma amurwos nuka Aburaam; abu kotac idiopet kotoma koroko ejai amurwos nuka Aburaam nakeriamunotor ka Melukisedek. Akoto eong einer nuikamunitos ngun kalaije kaibosit kaya, atupuruc adiopet. Ingai bo Melukisedek Lo? Kwana komisiik ngun. Kokau sek, ajeni Edeke itelepat yen yenabeit abunore. Ajeni Ngesi iboro kere.

Kwana irai oni atutubet naka Edeke. Irai duc ijo sek. Mam ijo iitunit ngin naarai abu ijo oroko irai aomisiot kotoma naka Edeke. Ejai bon ijo toma aomisiok. Ekonikiror elopet, arai abu kojai Oitabo loka Aijar aponi kibwaikinai ngina eroko apetetait naka akwap. Ajeni Ngesi nuirai ijo.

18 Ajai bon eong einer nu, mere ainyalakin aisisanakin, konye aitetetnaar ngin, tetere oni ikunyari awai kama ejai akuriau ka aiyalolongo. Mam ijo ijeni nuirai ijo. Mam ijo ilosi araun, konye kwana iraaas yesi odwe luka Edeke. Itei ijo, iraaas yesi sek odwe luka Edeke. Ianyu?

Naarai neajaatar Edeke ijo kotoma aomisiok kageunet, ejai ijo ajaut, atutubetekon ace, Aijar naejai tomakon kwana, ajai ajaut kede Edeke sek ngina. Eebo, neabu Ngesi, eroko ber Nges erauna ibore da kane kotoma akwap, eroko idiobore kejauna, konye Edeke, abu ijo korai idiopet kotoma aomisiok. Ajeni Ngesi loabeit ekonikiror araut. Ajeni eriagi loabeit ikonitim ajautor. Ajeni kere nuikamunitos ijo. Ibore bon abu kismawau neabu ijo, kwape ikadiakanaran...

19 Luipu kotoma kayesi epedorete-epedorete aimor eidicane keong kotoma aomisiot kana. Nakiraar ijo isapat yenididi, arai ipese yenididi, ipedori ijo airim ido ajaas iceboro luapedorete, neemam apedoriata aisirieb luce idwe, asubit bala ajai icebore tomakon yeneworoi. Ajai Edeke nenice, konye kerak korai ijo ikadiakanaran. Kiiunit ijo ngun? [Kotemari atukos ebe, "Amen."-Ekewa.] Abeit cut. Kwana arai bo ngin inyo? Arai ngol ejautene ngol loka Aijar kotomakon apakio ngun.

Kosodi do akaulo naka apak naedit, abu ijo kiira Eijiri. Aticepak abu ijo kolot okanisa, abu ijo koleman ka ngin, kosodi alosit anyoun odiini kiton odiini. Konye apak adiopet, ijo kwape iraar ijo atutubet naka Edeke, ajai ijo araut atutubet naka Akirot. Ido nakiirara ijo Akirot naka Edeke, ijeni ijo neibunitor, ijeni ijo nuaraas Abeit. Irai duc ijo, ajai duc Akirot tomakon apak kere. Abu Akirot koany ebe ajai Akirot kotomakon, erai nen naperoko apetetait naka akwap, abu koany Akirot kosodi ijo abunore neejai Ngin.

20 Kwape akawaragat naikamunit imurukalet, naka eipone loabu aimurukalet yenididi yenabekunitai kokwap naka akokor. Kosodi ikesa ngin aupa imiyo, nges, eworoi akokor, ido mam nges amisiikinit aiworoke. Ido-ido imiyo, inyamatakec ajaas toma oidula, mam nges-nges amisiikinit ngun, eipone

lokeswamata kesi ngun. Konye ajai icebore tomake, yenasubit bala etegelikina kede nuraas imiyo ngul, naarai kageunet arai ngesi imorukaaleet. Edolit ngin. Apaka adiopet abu totoke kobu emejai, ido, nakeirara ngesi aiworo naka amurukaaleet, etegelikina kede kutikut naka akokoro.

Ido kwangin nges ejaar kede kanginiyuunan loeurunitai irwan nakiareit. Ipedori ijo aipup akiro nuka ediini kere nuikoto ijo, ka iboro kere luegelara luiswamat etunganan; konye nakiliacaunia akirot kokinga kangina, kwangin ejaun ibore yenikamuni, ibuni ijo neejai Ngin. "Yesi luitwakito kotoma adiakar (aijar ngin) ketajaru Ngesi." Ekoto kojai Aijar naebait aitajarunio toma, nasodit ber. Edeke, kede ajenuniKe sek, ajeni iboro kere. Ido asekikinitai oni sek araut odwe lusap ka lupesur luka Edeke. "Yesi lukolo kitwakito kotoma aibucanareta ka adiaakanareta, kipou kere kekonenenete nen kolo, konye kitajaru Ngesi oni."

21 Koany Paul, nearaar Paul etunganan lokapolon loka ediini. Konye neatereikinotor ngesi ereet ka ereet kede Akirot, Yesu, abu kitajaru. Abu kojar katipet cut, naarai asekikinitai nges araut ngun. E...Arai ngesi atutubet naka Akirot; ido neabu Akirot koanyuna Akirot, erai ngin esubuneke. Kutikut kere naka akokoro, kotoma okanisa luka orthodox, mam apedorete aismamaun ibore komamake; abu koany Akirot. Arai atutubeteke. Arai ngesi emorukaaleet. Mam arai akokor; ajai bon ngesi odula kede ngul. Konye arai emurukaaleet, kageunet ber sek da.

22 Ajaatar eong awaragan naeputosi kwape kangipekangin, amuno eong ebe mam ebuni aisub bala namam edolit, nuikamunito itudo yenaurikinitai kwap naka akokor, apak adiopet. Mam nges apedorit amisiikin. Ikesa yenagelara, ikesa yenetegelikina, ido mam nges apedori amisiikin apua ka nginibore kere. Aboliasi kesi kotoma odula. Konye apaaran adiopet abu akokor kingarenik imiyoi kinga kau odula, kosodi ngesi adumun euria loka akipi. Eebo, abu kolot kowai loajaas akipi ngun ido kagogong kwape kapedoria kere. Inyobo? Mam nges ajaunar toma aipany naka akipi lem. Mam nges ajaunar toma akipi. Konye arai ngesi atudo, kageunet ber da. ibore idiopet bon yenabeit nges aswam nges amisiikin.

Ibore ngipengin nges erai eyuunan da. Ejai icebore tomake, yen, kiriamunos ngesi kede Edeke ereet ka ereet, emisiikini ngesi. Ejai ikinyomit ngin tomake, kosodete aitajarun. Ikatunga, edolit ngin, ido eporori ngesi awai kama ejaas iboro luka akwap. Etwakete ngul neejai nges. Ikatunga, eitunit eong, oni kere kijaatar aijarawok, kolo, kotoma oboro kangul luka akwap. Konye nakitingia oni Ibore ilopet, icebore yenabu kitajar oni, ikinyomit yenabu kojar, kwangin apotu do iboro kere luka akwap kobosiasi kanepakanen. Amamei do bobo oni eimiel loka ngin.

23 "Ngin yeneurunitai kama ejai Edeke, mam ediakari. Ikamaan yenilongaritai emameotor bobo aomisio nuka adiakar, emamei bobo eimiel loka adiakar." Angetakin aingiset naka adiakar. Iraun ijo atutubet naka Edeke, kotoma Kristo. Abu Kristo kotwana kanu alakun ijo.

Kwana koomoom ber ijo nuka ngun kere nutikirai oni korai ti komam erai kanuka Edeke. Konye Edeke, kotoma abaraKe naka aitim, eipone loalakuna oni atibong na! Aibo tikijai atibong nakorai tikomam erai aitim naka Edeke naebaraara kotomawok?

Kolo neapolor akwap adiakar noi, ebe abu etunganan idupo aronis abunore toma akwap kiton neabu kitakadikina kiton Edeke ebe abu kosub etunganan. Akou kere abu kobosia ajimis, akuan kere, ido abu Edeke kitakadikin kanukiinyo keswamauna etunganan. Aso abu kotema atiar, "Amudiari etunganan loabu asub." Ebuni amudiar kes naarai emameotor ngol idiobore dimarai atukos naka aronis.

Ido etunganane kere ti emudiaritai kotoma apak kangin, konye Edeke, loebarit aitim, mam apedori acamakin luemamei aronis ammudiar kede ikadiakanarak. Kosodi Ngeesi alosit kosodi aismamaun ewai lokuet kanuka ngul luakotos alomun toma, luakotos aswam adolit. Abu, kismamau ewai loka aitim kanuka ngul luakotosi aitim, kosodi aitemonokin ataker. Kotoma akiro ace, abu kibwaik abebenoka neejai imorukaaleiKe, tetere epedorete aporor ailam etube, kinyeis alumor kede akokoro. Konye abu kismamau ewai loka aiku, kotoma apaarasia nuka Noa. Abu na idupo Nges aswam ngun, ainakin ewai ngol, naarai abarit Ngesi aitim.

24 Konye akulo naka Nges ainakin ewai kanuka itunga kosodete kesi anger ngol, kwana, apolou naangerioto kesi ngol erai naarai imamei ibore kotoma yenijauni ngol. Emamei ibore yenijauni ngol. Atapit totoka einer ebe, "Mam ijo ipedori adumun aokot kaneejai irasit loenyaritai turnip, naarai emameete naarai emameete aokot kaneejai irasit." Aso arai emamei ejautene loka Aijar kotoma kangina kanu aijaun Ngin, akepolou mam epedorio aijaun.

Ngin nges apolou ainakini Iparisayon asesenate cut oreet loka Yesu, kosodete anyara Nges ebe Ebelesebul," naarai amamei ibore kotomakes kanu aijaun Nges. "Konye kere luaunaki Eong Papa," Abala Ngesi, "Epote mamaka." Ejai-ejai eiponece loelosere aitodiar.

25 Ipedori ijo einer kede itunga acepakio korotin, einer kede kes nuikamunitos Ejakait, ekienasi koingarenekon kanepakanen. Eebo, ibusakinini oni aswam ngin, kwape kwangin. Konye kopupok, "Emamei itunganan yenebuni mamaKang dimikito kenyarau Papaka ber." Edeke iswamai anyaraun. Ekoto kojai Aijar. "Ido kere luainiki Eong Papa, epote mamaKang."

Abu kiswamai ewai kanuka ngul luekotosi alakunio. Kosodi ainakin ewai kanuka ngul luekotosi angaleun. Ido naarai ebe abu Ngesi kiswamau nu, itarauni Nges araut loebarit aitim, kwape duc eraar Ngesi loebarit aitim. Ebusakinit korai, arai kinger ijo Nu, emamei bobo ibore yenideuna dimarai etube, naarai ibusakinit adiakar atubokinio.

Parao, nakelomaria toma angolol, kwape loitupusi, aomit ebe apedori ngesi da alomar toma bala kwape abu Musa kiswama. Musa ka akejore, kosodi Parao kede akejore, kesi kere iarei abeit ti amudiar kotoma angolol, asubit bala ti kwangin. Konye Edeke, loebarit aitim, abu kiswamau ewai loka aiku kanuka idwe luka Iburanian, (Inyobo?) Naarai alosete ngul kotoma okokoro loka epelu, aderito kesi Akirot.

Kwana ngol bon nges eipone loka adumun aitim, nges aitup aicorakineta nuainaki Edeke oni alosit kotoma. Ngol bon nges eipone loepdoria Ngesi aitodun aitim, nges neitupia oni nuabala Ngesi aswam.

26 Kwape epeget edio pac, kede ejaanakinan loabala ebe esisianakini eong Aisisianakin naka ikiyakia kotoma apak kana. Eyuunit eong ebe enerit eong ngun akaur adiopet arai aarei kau, arai acepak, nuikamunitos eipone loabalar ngesi ebe, "Itamit ijo aitolomun toma atur na, Aisisianakin naka ikiyakia." Ebala ebe, "Abu atur naka ikiyakia kongetakin, kede ikiyakia."

Kasodi eong aingit nges ebe, "Eebo, ijo iyuunit Akirot?"

Ebala, "Eebo."

Eong ebe "Apukokinio 22:18 ebala, ebe, "Ngin yenelemari Akirot adiopet kokinga naka Na, arai ayatakin akirot adiopet tomaKe.' Mere akiro aarei; Akirot adiopet, alemar Akirot awai."

Ebala, "Eyuunit eong ngin."

Eong ebe, "Aso apedori eong alimokin ijo neainakinire atur naka ikiyakia, aponi koinakinai Arerengusio nuka atur naka ikiyakia neejai Ekanisa; kwana kolimokinai eong neabu Edeke kolemaria ngin kama ejai Ekanisa, kede Akirot. Mam ijo ipedori aswam ngin; emamei." Kwana kiitu, ebe abu Petero, kotoma Apaaran nako Pentekosit, nges arai e-eketegearan loka atur naka ikiyakia. Ido abu kolimok ngul 'Aitoronokin, kosodete aibatisaun Kokiror loka Yesu Kristo kanuka aisionio naka adikanareta, idumunete ainakinet naka Emoyo Lokalaunan. Naarai aisumunet erai kanukus, ka ikusidwe, ka ngul da luelwaka, kere luenyarauni Ejakait Edekewok."

27 Kwana arai ikoto ijo aipup aiworo naka akokor ace naka ecediini kosodi aijar kokau kokinga kangina kotoma oboro loka akwap, ido elosi ngin aitodun ebe ejai ibore yenerono. Naarai, erai Ngin Akirot. "Idiotunganan yenekoto, kobu." Arai ijaatar ijo eipud, kobua. Konye arai kimameotor ijo eipud, akepolou ijai do ijo toma ojautene lokaronon. Konye arai kijaatar ijo eipud abunore, kobua kotupak ainapetai naka Edeke!

Ido mam nges ekurwokini aitodolikin nuisumunikit Ngesi. Adite kolo eong, ido kwana amojong, mam eong aanyunitor Nges ekurwokini kotoma Akirotok. Naarai, epedori kereka Ngesi aswam idiobore kosodi akurwokin. Mam Nges epedori akurwokin. Mam Edeke epedori akurwokin. Mam epedor Edeke akurwokin, kosodi asalakin erai Edeke. Ejai nges araut, kanu aswam ngin.

28 Kwana abu ajore naka Parao kotam aituput, naarai mam nges anyaraunitai ido amameotor kesi Aijar ngin. Toma...Mam aisumunet ainakinitali Parao. Mam ainakinitali nges aisumunet kanuka aisumunet naka akwap.

Ido ekatuputon, atamit atupit eyuunan lokabeit loenyaraikinitai neejai iboro kwape kangul, eyangauni bon ngin akienasit naka ngin. Ngin nges ationis kede ewokoswamae loka ediini lolo, erai ebe itunga luipu noi etamitos aituput aibatisao, itunga luipu noi etamitos aituput atur naka ikiyakia. Erai ngin kanuka ikeyuunak, ido ngul bon. Eswamau Edeke ewai, ebarit aitim, tetere mam idweKe emudiaros. Eswamau Ngesi ewai kanukec.

Kwana, Parao etamit atupit, kosodi alumor kotoma akipi ngupengun nuetajarete Musa ka atukosike. Kwana, mam imusa abu kolumo, naarai ebarit Edeke aitim neejaas ngul luetupitos Ekewai loeinakinitali. Amen.

Yesi isesenete nuapeleikinit eong? Ebe, atibong na, itunga lumam iyuunitos aitangal naka Edeke, itunga lumam iyuunitos aibatisao naka Emoyo Lokalaunan, eipone ali edumuniata kesi idiobore? Ebarit Edeke aitim neejaas ngul luetupitos Nges; mam luetupitos etal, konye luetupitos Edeke.

29 Ejai Edeke toma Akirot, ido abu koraun akuan kiboiororoi kakidingosiwok, kwana, tetere itolomuni ipitenin luce luka Edeke. Akuan, Yesu, arai akuan naka Edeke, eipiteneKe. Abu Musa koany Nges etubor, atutubet naka epuraKe; amamei etunganan loaanyunitor Ekereet. Konye kwana kiany oni Nges, kingolia da Nges, aanyun Nges kwape Asubanit. Kwana, itei ijo, arai Ngesi eipitene loka Edeke, kitodiaritali, Akirot. Ngun kes nuarai Ngesi.

Ido nakebunio edioyuunan neejai Edeke, eraun ngesi eipitene loka Akirotoke, itwasamao nges aitodiar Akivot naisumunikitai kanuka apak kangin. Ianyu? Edolit ngin. Edeke, loebarit aitim, mam ejalakinitor oni komamei ajenanut. Ebarit Ngesi aitim.

30 Idumuni kwana oni ebe arai Edeke loetimono noi neejai Musa kokinga kangina kotoma angolol kangin naatwan (Dead Sea), atema, kotoma angolol Narengan kokinga kangina. Aso neablar Ngesi kane, kotoma Anyoun 19:4, abala ebe, "Abu kadaka yes kotoma abebenoka nuka emurukaalet, kayangau yes mama ajai. Abu Kodaka kes kotoma abebenoka nuka emorukaalet, kayangau yes mama ajai!" Ajaas icetunga da toma akidingot naka angolol kokinga kangina, kotamitos aituput. Konye inyobo? "Abu kodaka kes kotoma abebenoka nuka emorukaalet."

Kwana itupusi duc Edeke inabiniKe kede imorukaalei. Ido arai bo ngin inyo? Musa nges arai Ekekiyakia. Ido atupakito ngul Musa, ido ngol nges arai abebenoka nuka emorukaalet nuaponi kodakarere kes, naarai adakit ngesi aisiraret naka Edeke. Kosodete itunga atupakin ngin. Atupitos kesi Edeke nape katupitotor kesi Musa kede aisirareteKe naka alakunio. Ido abala Ebaibuli ebe, "Nges, apotu komudiaros mere kede ngul lumam eyuunitos." Naarai, abarit Edeke aitim kanukec, naarai atupitos kesi aicorakinetaKe. Ekoto Edeke oni atupakinit aicorakinetaKe.

31 Ipedori oni alimun ibore ngipengin kanuikamunitos Kora ka nuikamunitos Datan ka atukosikec naka itunga lumam iyuunito, kwape katamitotor ngul aituput. Atamitos kesi airupakin icebore toma ainapeta nuka Edeke. Mam kes aaminas ainnapeta nuka etunganan ediopet. Mam kes akotosi ngun. Ajai kes ajaun kede icebore yeniswaman. Abala Kora, "Inyobo ejaas itunga ice luelaunito adepar ijo, Musa. Isubit do ijo bala ijo bon esawe loka asinge loejai...arai bo atemas, ijo bon alicait najjai oisawe loka asinge." Kosodi atemar, "Eong-eong...Mam ibusakinit ijo aswam ngun. Ido ejaas itunga luipu ne."

Ido ajeni Musa ebe abeit nges adakar idwe ngul toma akwap naka aisumunet, naarai aponi aisumunet kijaikitete nges. Ido ebusakinit nges adakar ngul toma akwap naka aisumunet.

32 Ido. Lolo, ejai Emoyo Lokalaunana ne kanu aitogogong Akivot naka Edeke, ido ngin abebenok naka emorukaalet naebait adakara oni; mere ecediini loiswamaunit etunganan. Konye ebeit oni adakario kotoma abebenoka nuka emorukaalet, kiton akwap naka aisumunet.

Ido aloseite kesi adumun atukos naka akokoro kokinga kangina, aomit Kora, ijeni ijo, abunore kosodi aituput lo, emorukaalet. Ido nakeswamata ngun, abu Edeke kotema, "Kotiakun kama ejaas ngul," kosodi Ngesi ailikor akwap. Ti Nges ilikorit nginibore kere, esube kere, konye abarit Edeke aitim kanuka ngul luatamitos atupit Akirotoke. Duc, ebarit Edeke aitim. Apotu luipu kopotu kosodete aangar ewai ka Musa, kosodi Edeke angaar akwap kosodi ailikor yenimam eyuunit. Ngol, lomam e-eyuunit, ebuni duc amudiar."

33 Ngul lumam apotu kiyuutu, karaida apotu kolomutu kosodete alosit ipak edit, konye, ngul, abala Yesu, "Etwakata ngul, ngolidiopet kakesi." Atwanare erai "Amudiar." Etwakata. Koomoom ber ijo nuka ngul. Apotu kolomutu kinga, koanyutu da nukaumokin nuka Edeke, apotu koanyutu akan nakaumokin naka Edeke, apotu kinumunumata emanu; kosodete anyoun kosodete apupokin etunganan loanyaritai Balaam, loabu kitapa erot loka Edeke, kede aisisianakinike naangolopasi kede Akivot, "Irai oni kere inacan, aso emurikikinos kere nepepe."

Erai ngol eswamae ece loka Balaam enyouni, lolo, "Emorikikinos kere nepepe." Mam ngin abuni aswam kede Emorukaalet, Emorukaalet Yawe. Iraas yesi imurukaalei ludidik.

Ejaas iuni bon luaponi kitajarai kotoma atukos kere; Mosa, Kaleb ka Yosua. Luce kere apotu komudiaros kotoma amodingot; abala Yesu kwangin, kotoma Yokana Eijiri esula lo 6. Edeke, kotoma aitim, mam apedori ainyekikin kes amudiar, naarai, luce lumam eyuunito. Apotu kere kotwakikisi amodingot, ido etwakito. Abu Edeke kitajar Musa ka iyuunak lumorukaalei, naarai ayongitos Akirotoke.

34 Ido lolo, opapero, eipone ediopet bon lokipedoria oni adumun asianut kede Edeke; ebarit Edeke aitim, lolo, konye ebeit oni ainakin ayongio nuelimunit Ngesi kanuikamunitos ngin. Ekoto ijo ayangar nuabala Edeke. Abala Ngesi ebe, "Koraun akivot naka ngitunganan kere aingal, ido naKang abeit."

Lolo kilimokinitai oni ebe, "Kere nuebeit ijo aswam," kotoma aiboisio nuipu, "Nges alomar okanisa, ajaun kede etal, arai icebore kwape kangin, arai einer ailip, arai aibwaikin ekonikiror toma oitabo, arai aicokicokio arai aibatisao koiponece, arai icebore bala kwape kangin. Ngun kesi kere nuebeit ijo aswam." Konye ibucara ngin.

Kanu araut imurukaalet yenika Edeke, ekoto ijo aitup Akivot, apaaran kiton apaaran. Ebeit ijo ainyokinit, ainyam Akivot.

35 Kwana, ianyuni oni kes, akaulo naka apak kana, engurianete bobo, enonokiaros kotoma aiyuun, akaulo naka Edeke aitodikin kes asianut. Ido ianyuni oni kes engurianete kede Edeke, ido, nakeswamata ngin, ajaas atwakere kede akonyokonyio naka imunio, ebusakinit kes ngin. Abeit cut ebusakinit. Iditunganan yenekurwokini amisiikin Akivot naka Edeke kosodi aswam iboro lu luapotu ngul kiswamata,

ebusakinit atwanare. Nginidiopet kakesi, ebusakinit atwanare kotoma amodingot.

Konye nakedekakinotor kiton ebe karaida emuron Musa ka idiotunganan kere mam apedori aswam idiobore yenikamunit ngin, ido ajaas atwakare kotoma olukumin; konye Edeke, loebarit aitim, abu kiswamau ewai loka aiku kanuka ngul luapedorete aiyuun Nges. Abu kiswamau ekato kanuka ngin, koipone loka aiswamaun emun loka aisinit. Edeke ebarit Ngesi...Abu Edeke kiswamau ewai loka aiku tetere idweKe lueyuunito epedorete angaleun.

Epodokinit Edeke idiobore yenaronon, idiobore yenimuno ijo. Nginikujakinet naka aijar, epodokinit Edeke ijo. Irai ijo ikokuKe, ido ebarit Ngesi aitm. Ekoto Ngesi aiswamaikin ijo.

36 Apotu kodiakasi ekaulo, kanuka alemun ibore yepeyen yenabu Edeke kiswamaunia alucet kanukec, kede emun loka aisinit, loabwoikinit adiakar edaunitai atubokin, kosodete aima ainakinet. Ido abu ngin kodiakar bobo. "Mam Edeke emorete aibusesuKe kede idiotunganan." Kanuka ngun, mam oni ipedori ajaun kede idekesio iarei, iuni, iwongon. Ejai Edeke ediopet bon. Mam Nges ebuni aimor aibusesuKe kede idiobore kere. Erai Ngesi Edeke, bon, itei ijo; kwape ejaatar ikapiirin idekesio luipu. Kijaar oni Edeke ediopet, ido mam Nges ebuni aimor aibusesuKe kede ece, karaida Nges acamakin idiobore araut yenemaio koingareneKe. Karaida kabu Ngesi kiswamau alucet kanuka itunga, ido arai Akirot naka Edeke, adolit ngin; konye neapotu kesi kogeuniata aima ngin, kwangin apotu kolomasi ationis.

37 Kwana ibore ngin ngipengin, aomit eong, yeneswamaikin aturiowok nuka ekanisa. Abu Edeke kijukak oni aisiraret naka Martin Luther kede aisirareteke, John Wesley, aisiraret nako Pentekosit, konye inyobo apotu oni keswamata kede ngin? Iboree ngipengin yenapotu kwi kiswamata kede emun loka aisinit, apotu oni ataraut ngin aput naemaioi, "Ajai eong toma lo, ido ajai eong toma ngol." Itei ijo, ijai ijo toma obore ice komamei ainakina kere naerucokina kede aima alopet nakabeit naka Akirot naka ayongit Edeke.

Inyobo abu kiswamaun? Ebaibuli, kilimokinitai oni kotoma Obaibuli, ebe, "Abu enabi kolem aput ngin kosodi amudiar ngin." Aleluia!

Ibore yenipuda oni kotoma aiboisit lolo nges enabi loemudiar aput naka ediinin, lueomitos ebe elosete kesi toma Akuj koipone loka ajaut otal ece arai ediini; ekoto amudiaro ka aicwario, kocakarai awai. Ileleba Edeke aitim. Ebarit Ngesi aitim. Kotoma apak naabeitor ti oni kere ajaut toma aigurwokina naka amuton kokinga kangina, konye Edeke, loebarit aitim, ejukaki oni Emoyo Lokalaunan lokabeit, kede Ekejule Obe loka Ngin, cut kane kotoma aduketait nginikuar. Edeke, loebarit aitim, eipone loidumunitor oni Nnges araut loeumokina! Eebo, ipa.

Kwana kere nuaomitos kesi ebe apedorete kesi aswam nges bon alosit neejai emun lo, arai ibore yen yenabu Edeke kiswamau kokinga kangina, abu koinak Musa aswamaun kosodi aikajakin kuju opirit, ido apedorete kesi angaleun komamei ainakina edio. Abwoete kesi aibwo kosodete angoliar ngol. Kosodete kesi adolokin ataraun ngin aput naemaio, kosodi Edeke aijukun enabi kosodi amudiar ngin.

38 Kwana, kere luapotu kongeroto angoliar emun kotoma amodingot, apotu komudiaros. Kwana iswamauni Edeke ewai, konye arai kinger ijo angoliar ngol, arai iboikin ijo orot, arai kidongakin ijo toma otal ece kosodi ainger angoliar kaitebeikin toma Akirot kosodi aanyun arai edolit arai mam; kere luangerete angoliar, apotu komudiaros. Ido mam cut Edeke erai Edeke loijulanakin. Ido kere luangere angoliar, apotu komudiaros. Kwape kwangin lolo da, ibore ngipengin.

Kosodete adiakar ekaulo, ido kwape duc keswamata, kosodete aiswamaun aput naemaio kama ejai-kama ejai ngin, aitarauun ngin a-a-a...adumun, aitam adumun angaleu komamei ainakina kede etau kere, kosodete kesi "ajaas toma obore ice," ido eipone lokiswama oni lolo. Ido kwana iseseni oni kolo, atiaketait naka ngin, arai, ebe Edeke...

Arai alucet najokan ka aanyunet nakajokan kanuka apak kangin. Kotoma apak kangin, ajok ngin. Konye arai bon nabeit araut kanuka apak kangin, kanuka asapaali kangol. Ngun bon kes kere nuepedoria ngin aswam, esapaali.

39 Ido aisiraret nabu Martin Luther koyangau, naka aitojokio, adolit ngin kanuka atur naka Luther. Erai ngin adoketait nabu ngin kodol.

Aitalaunio ajok kotoma atur naka Wesley. Nen nges abu ngin kodol.

Apote do oni toma atur nako Pentekosit. Ka ainyakakinio naka ainakineta erai ibore yenejok noi, arai najok kotoma atur, konye ijai oni alosit adepar ngun kwana. Idepa oni ngun, cut abeit noi kwape ejaar akwap. Ekoto oni adolokin adepar iboro lu, naarai kiswama oni ibore ngipengin kede ngin yenapotu kwi kiswamata kolo, aiswamaun aput naemaio kama ejai ngin. "Arai eong loka ainapetai kana naka ngol, arai eong loka ainapetai kangin naka ngol."

Ebuni Edeke aijukun ecetunganan loebuni aitiaikin ibore ngin kosodi aiwelewar ngin kiton araun amunyumunyen, kosodi aitogogongoor Akekirot, Akirot naileleba. Koany. Kituritete Edeke! Kwana iseseni

oni ebe arai ngin abeit. Edeke, loebarit aitim!

40 Ido neamudiara enabi na, abu kotalak kes emamei aanyunet naka angaleu, naka alucet, naarai aponi komudiarai aputokec. Konye Edeke, loebarit aitim, abu kiswamaik kes ace. Ido inyobo abu Ngesi kiswama, ngun? Abu kigurwok akipi kotoma atapar naajai oyekalu, kosodete luipu abunore kosodete angaleun, koipone kalo adokar toma akipi. Abu Yesu kobu atapar ngipengin, kosodi angoliar etunganan loajai eperi kanen adaun ikar luipu, kidarit aigurwokinio naka akipi. Itei ijo Edeke, loebarit aitim! Karaida apotu kesi kitarautu ibore ngin aput naemaio, karaida abu koyangaik enabi atiaikin ngin, abu Edeke kiswamau ewai kanukec, 'naarai ebarit Ngesi aitim. Ekoto Ngesi kes kongaleete, kosodi Ngesi aiswamaun ewai kanuka angaleukec.

Kwana, aso abu ngin kolot ngaren, abu akwap kiyatak aroniar ka aiyatakin amunaar noi, apak kere. Ido awasia abu akwap komunaar noi kiton ebe ti Edeke emudiarit, abu kotema kotoma Malaki 4, "kenyek abunore aidany akwap kekenit." Ti Nges kiswamat ngun; erai bon aingiset.

41 Konye do, Edeke loebarit aitim, abu kijuk Eketajaran, Yesu Kristo. Abu kijuk Yesu araut Eketajaran ka Eketagalan. Naarai abala Ngesi ebe, "Kwape abu Musa ikajakina emun loka aisinit kamoding, kwape kwangin ibusakinitor Okoku loka etunganan da aikajakinio," kanuka alosikinet kangipekangin. Nges, alucet, ngin nges iburai oni, emamei idiobore kidimarai alucet. Nuabu Yesu kogwel kede Aokotoke, ngun kes iburai oni. Ido abala Ebaibuli ebe, "Aponi ngesi kimusungai kanuka epaliwok, aponi kisiriebai kanuka numam adolitewok, aiticario kanuka ainapakiniwok kojai kanges; ido Ikemacarin kes kitangaleunete oni." Ngun kes ipedori oni aibura, naara ngun kes abu alucet, naibwoio oni, kicorak oni. Edeke loebarit aitim!

Arai na alucet Namam Edaun, naarai abu Ngesi kobu Elopet. Edeke Elopet, kotoma ojautene loka akuan nadiakanaran, kanu aiswamaun a-a-alucet Namam Edaun; Kosodi abongun kotoma ojautene loka Emoyo Lokalaunan, kanu atogogong alucet. Neemam emun loka aisinit arai neemam akipi nuegoirokinio apedoriata aswam ngin, kere adodiaritos neejai alucet naitekooro. Edeke, loebarit aitim, nges eswama nu.

42 Kwana, lolo, kwape eraar apak naijari oni kotoma, kilom oni kotoma aturio kanu nuka ekanisa kasodete aitetem nginibore kere awai kama ejai Ngin. Itungawok luka ediini luka apak kana atwakiasi ewai ngol loka Ngin. Itetemete kesi Ngin kere awai, neejai apak ace, atur ace, icebore yenegelara, kau cut, apaarasia nukolo sek. Kosodete aitangal naka Edeke nepetai alemar awai, ationo ijo adumunn itunganan yenapedori aiyuun ngin. Akienatar ngin. Mam nepetai edeparit ikar akaisaarei kau. Akienatar kesi ngin. Apotu luka Pentekosit kotoma aswamisioit konyoutu awai kama ejai ngin. Apotu kogeutu kotoma apaarasia nualingakinete, konye apotu konyutu awai kama ejai ngin.

Koany eipone loapotu kiswamatar. Kwana ainakisi kesi ediini emunaar noi, akerit kinga aiswamaun etal, kaceda. Kidimikito, aiboisit naka acamun Aica, kwape kelomuna Aica toma; apotu koraunos erionget kosodete aiswamaikin akecewat etalesio, nginidiopet ebuni, aiswamaun akeisisianakin kosodi asalakin toma aisisianakin ngin. Ido ejaas nuipu nuelemanaritari awai kiton neemam Emoyo Lokalaunan epedoria alomar toma okanisa. Araunos kesi aceput bala kwape emun loka aisinit, abu koraun aima aputosia. Nginitunganan abala ebe, "Ajai eong toma lo, ido arai eong loka ngol." Abu koraun aima aputosia. Ekoni bo ai aigurwokina naijai oni toma, kotoma apak nakawasia.

Konye Edeke, loebarit aitim, enyaku Emoyo Lokalaunan tomawok, ido kitogogongi Akekirot atibong na kwape kesumunikitor Ngesi ebe abuni aswam. Esumunikit Edeke ebe abuni aswam iboro lu. Koany nuabu Ngesi kiswama!

43 Koany nuabu Ngesi kiswama, eipone lo kwana ipedoritor oni aanyun eipone loabu Ngesi kisumunikitor nginitur icebore aiswamaun. Ido kiany oni ebe abu kiswamaun cut becebec kwangin, kwape abalar Ngesi ebe abuni aswam, naarai ebarit Ngesi kotoma aitimike, kanu duc ajaut kede aitim aitodolikin nginikirot naisumunikit Ngesi. Ejai Nges aswam ngin, ido duc iswamai, kanu asalakin erai Edeke. Duc iswamai Ngesi nu, ejai duc Akekirot aitodolikin kotoma apakike. IkinyomitiKe yenabu Ngesi koyeik toma akwap. Inyobo abu Ngesi kiswama? Abu Ngesi kibwaik Ngin ne toma Akirot, ido ngin nges ikinyomit. Ido nginipak naebunio atur, etioni ikinyomit ngin, kosodi aisikwarunio atakanun. Ido esumunikit Ngesi ngin, ido iswamai ngun.

Kwana mam oni ebusakinitos iboro lu. Mam oni ebusakinitos arerengusio nu nuka Edeke, naarai kipou kalomasi kinga neejaas iboro luka akwapin, kipou alototo toma aibucar naka Kain. Kain, aiduk etem loebus ka ekanisa loebus, kosodi aibwainikin aturo tomake, koomite ebe arai ngesi ngin cut bec, "Arai atukos naka apples arai pears, arai pomegranates, arai idiobore yenarai ngin," nges abu papake ka totoke konyamitos komanikor lo Eden, nabu kirengea kes kinga. Aso abu koinak ngin ainyakakin Edeke, kosodi Edeke ainger ngin.

44 "Konye Abel kanuka aiyuun abu koinak Edeke asubanit naetelekarit adepar naka Kain."

Ido, lolo, abala Ebaibuli kotoma Yuda, ebe, "Akereta kotoma orot loka Kain; amudiaros kotoma oiner

loka adumun ameda loka Kora." Itei ijo, "Akereta toma orot loka Kain," Aiduk etemuan, aiduk ikanisan, idiinin, aitubusiarit kede atur, lutiek, imeeban luipu luepote kosodete asomanar kuju ka kwap, arai aijang akanin, arai bo aponi kibatisai koiponece, arai einer kotoma angajepa, arai akerit airimirim agoola, ibwaiknete kesi ekecekiror oitabo. Abeit ngin. Kosodete aibelokin neejai Abeit obe naelimonokinio, kosodete ainger Ngin. Eipone ali epedoria araun kwangin? Koany ber ijo aitolitoluna najai oni toma! Komisiik.

Ido abala Ebaibuli ebe, "Kosodete alosit korot loka Balaam, kosodete amudiar kotoma oiner loka Kora lokadumun ameda." Apotu komudiaros kotoma oiner loka adumun ameda! Inyobo arai einer loka Kora loka adumun ameda? Inyobo, iomit do ijo ebe ijo bon irai etunganan loilaunit? Inyobo, Edeke...Oni kere ilaunit. Ekanisa kere edolit. Kangini...Emorikikinos kere nepepe, ngun kes nuibusakinit oni aswam." Nen nges apotu kesi komudiarotor, ngun. Ido abeit cut ibusakinit oni ngin. Ebusakinit oni araut ngun.

Konye Edeke, loebarit aitim, eriu oni kinga naka aigurwokina kosodi ainakin oni aanyun ngin eroko ibore kinoma ne. Ebarit kotoma aitimiKe, kosodi aijukakin oni aisikwarunio naka aitangal naka Edeke, ka abongun bobo naka Apedor naka Edeke. Kwape ejaar kotoma akiro nukolo, emamei aisikwarunio nabu kodau ikar iuni. Alot aisikwarunio na adaun ikar itomon ka lukany, araun akim naenokie, airimor kosodi airimor akwap. Inyobo, erai kereka naarai ebe ebusakinit oni ngin? Edeke, loebarit kotoma aitimiKe, mere naarai ebe kipou oni emielasi ngin, atemasi, araibo ebe ebusakinit oni ngin. Koomoom ber ijo nueswama ngin!

45 Aomoomoi eong nuka adiopet kotoma ainacanokus kane ko Phoenix, naejenete luipu kayesi, amucalat Hattie Waldrop, ajaatar ngesi engoti loka etau. Ido ajai ngesi okokoro loka ailpakinio kokuju kalailo neabu Onac Moore ido ajai eong ne irwan nasodit, nepetai ikar itomon ka lukany, itomon ka lukanykauni kau. Kwape ajaar ngin atwanare, kede engoti loka etau, ido abeit ti nges kotwanite apak kau. Konye Edeke, loebarit aitim, abu kijuk Akepedor mamake. Kosodi aitajar akeijar, ido ejari ngin lolo. Edeke loebarit aitim!

Etunganan loka Congress Upshaw, etunganan lokapolon. Aomit eong bala arai nges ekapolokiniton, arai icebore, yeniko-yeniko Baptist, Atukonokin naka Angalakimak nako Baptist, kapak adiopet, arai ekatupiton lokapolon arai icebore. Abu ngol kiswamete kere. Arai ngol etunganan lokajokan. Abu kiswama kere nuajeni ngesi aswam. Abu kolosite neejai nginimuron kere. Elipanakitosis ijaanakinak ngol. Aponi ngesi kobukokinai epipa loka akinyet kuju akou, ainyonyoikinio, naka ijaanakinak luegelegela kanginiboisit kere.

46 Akuar adiopet, Los Angeles, California, abunore kiton kuju olutaari, koany atukos naka iicolongo luka ikadekak nepetai irwanaarei, irwanauni, naka luiboiete kanen, kere kuju ka kwap naka ikokoron luka iicolongo luiboere, kau ka ngaren. Kosodi kanen aperi kalaije ejamu kede ipese yenirionon kotomake, ipese yenirionon korai imusugut, ido eboie totoke kosiepike. Kosodi onaceka aibwakin ekokoro loka ailipanakinio.

Ido ajai eong asesen, komam ajeni nualosete ngaren. Kasodi eong aanyun emuron, kede agalibitin nuka abokoyat naka akolodong, loajengi ipese yenididi yenirionon, kanuka ejautene loka eporoto, kosodi ngin alejekakar. Kosodi eong angolongol, abu eong aomoom, "Aibo ejai ikoku?" Mam eong etei nges.

Akaulo naka apak naedit, kokwap kalaije, komamei amun, ipese yenididi nepetai ikar ikanykaarei arai ikanykauni lukapolou, araut yenilejekek adaun ajarake kere. Ido ajai totoke nen kokuko akunginike, kilipi. Aso abu eong atema ebe, "Abu emuron kojeng ikonipese," kosodi aitwetemun.

Abu kotema ebe, "Abeit ngin, lokapolon."

Kosodi aitam ayangaun ikoku olutaari. Aponi kolimokinai nges mama aswam ngun. Apotu kotamata aisililing nges. Nepetai esawa loesililingiata kesi ngin, abu eong aomoom ebe, "Eebo, eebo kodum arereng naka ailipakin nges." kotoma odakikan idis...Aticepak ajaas itunga luejaas ngina akuar ngin.

Ido ajai eong asesen laiye osipan, abu eong aany ipese ngin elosi kwap, kosobite bala etorit orot loediding, kede idool kakaninike, ituurei idool ngin. Mamamce nuabala emuron ebe alosi ngesi araut yenilejekek angetar ajarake kere; Edeke, loebarit aitim, abu kijuk Emoyo Lokalaunan, kede aitapoet, kosodi ipese anyoun kokinga kangina, kosodi ngesi ka totoke aitingakin akanin kosodete alosit kitoritos kiding naka ikokoron luka icolongo, kituritos Edeke.

47 Kokau kangina eboie etunganan loamojongit, etunganan loka Congress Upshaw, luipu kayesi ijenete ajanaanutuke. Arai ngesi etunganan lokajokan, abu kotam ajarake kere, ikar akaisakanykape ka lukanykape loadana kotoma oicolong loedakitere adekak, koremitete kojamu; ibelai luelosere kakaninike, lualosio ngesi, mam bobo cut alosit ejok. Ido eboie ngesi kangina, koseseni ngun. Katipet, abu eong kangolia kasodi aanyun aitapoet. Kane, abu ngesi kobu, elosi kokuju naka esipan kangol, kitulurite akekou, apedorit alosit ejok noi kwape idiotunganan kere. Mam eong ajeni loarai etunganan ngol.

Abu eong atema ebe, "Ejai etunganan lokapolon loiboie kokau kangina. Abu kibirun aboogi nearaar ikoku yenididi aibirokin kuju atuba naibwaanakinio inyammat luka ibaren, kosodi aimusung ekepur. Apotu kobokinikisi aipanya agoola, kanu aitobwoun amaran, nealosioto iyunga, kanu atironor ekepur." Abu eong atema, "Araun ngesi etunganan lokapolon, inyikokinit ngesi aiyatakinit apolo. Iboie ngesi kotoma alukunet

nakapolon kotogo lokapolon loka America (White House.)”

Kosodi etunganan lo abunore kosodi alimokin eong, ebalu “Erai ngol etunganan loka Congress Upshaw. Ijo ipupunitor nges?”

Eong ebe, “Mam cut eong apupunitor nuke.”

Aso abu ngesi kiria acuuma naineris kau ngina kosodete kesi einer, kau ka ngaren.

48 Kasodi eong ageun angolongol, kasodi aanyun etunganan loamojongit loka Congress ebunit neajai eong, kotoma aitapoet, kitekooro cut noi ido ongalei kwape kapedoria kere. Edeke, loebarit atim, abu kiriu nges anyoun koicolong loka ikedekak, kosodi alosit komameete ibelai kiton apak natwania. Edeke loebarit aitim! Abu okurwok imurok, neabu kokurwokina science, neabu nginibore kere kokurwokina, abarit Edeke aitim neejai etunganan loka Congress Upshaw.

Aomoomoi eong nuikamunitos eong elopet. Kwape itelepat yenididi, eitunit eong kwape...Enyaritos itunga eong lolo, “loangara angor.” Apolou naraar kwangin, erai naarai abu eong aany aronis naepol kaneejaas angor nearaar eong ikoku. Alaet eong kes. Ido mam eong ajeni ngun kwana, naarai ajeni eong ejaas nuejokuka. Konye eitunit eong eipone loaroniar, amunaara noi. Kasodi eog aomoom ebe, “Ikatunga, mam cut eong-eong abuni ajaun neejaas itunga. Mam eong asiomit, aso mam eong apedori adumun adio.

49 Ido arai eong ikoku yenididi eboie kanen, komamei karaida esaati loanapit, kede ikakooti ikaja koipone kalo, kede ipiso yenayuara, ido komwana ngin teni abeit. Kosodi ekesisianakinan atemar, “William mam kereka ijo imwana kede ekooti ngol loinapit ijo?”

Abu eong atema, “Mam, toto, alilim eong mot.” Kosodi ngin ainakin eong alosit asigiri kasodi aibwaikin akito toma asigiri, ido abeit ti eong anokiar. Ido amameotor eong esaati angetaki apak ngin kere.

Kasodi eong aomoom, “Korai eong adiopepak adumun isirigin, acepak ebe apedori eong adumun idis, ti eong adumun emuudu,” “Ti eong alom kinga To lailo kasodi aijar kalailo kosodi amej, angetakin aijaraka kere. Mam eong akoto idiobore yenikamanara kede itunga. Aiboi awai, naarai mam kes akotosi eong, kasodi-kasodi ti eong aiboi kanelwana kamakec.

Kosodi nginipak nealosio eong otaun, ainerakin kede idiotunganan, aanyun ikesa ice korot, luajeni eong. Amina eong atemar, “Biai bo yesi lu, John, Jim! Biai bo yesi?”

Itei ijo, mam kes akotosi einer kede eong, mam akotosi idiobore yenikamunit eong, kanuka papaka ka ngul lueswamaete ajon. Ido mam eong-eong eswamat ngun. Mam arai idiobore yeneswamat eong. Ido ti eong arai loka eipone kangol.

50 Konye kwana abu eong alimok akaberu, pac ebe, “Iladatai akarwatat kede imuudun lukajokak kakere luepedorio agwel.” Oo, aomoom eong nuikamunitos igoen ngul luepwokuna. Lolo ajaatar eong isuutin iarei arai iuni lukajokak. Ido biai emameete ipapero? Erai eong angopit amoding, kanu alwanis kaneejaas itunga. Inyobo ationis, biai erai kereka kanuka etunganan loarai eong, biai erai kanuka asiomanika? Mam. Edeke, loebarit aitim, abu kaany eong kotoma adoketait kangin kosodi aitajar eong.

Eitunit eong arikilai eong kede akanin, bala emuduk. Mam eong apedori asesen. Idiobore yenajai ngareneka amusumusi; ti eong amudukanara angetakin aijaraka kere. Konye, Edeke, loebarit aitim, abu kinyakak akaikweny. Arai eong lokapolou naka ikar akaisakany ka lukany, ido aroko akwenyi ejok. Edeke, loebarit aitim, nges bon ibore yenapedori eong alimun.

51 Sek amameotor ekanisa ewai loainakinitai kanuka angaleu. Apotu kodumutu ediopet kosodete ainger ngol. Konye Edeke, loebarit aitim, ejukaki kes ainakinet naka aitangal naka Edeke. Ngol nges Emoyo Lokalaunan kakidingotowok, kitogogongoori Akirot kede aanyununeta etupanakinete. Edeke loebarit aitim!

Kijaar eong atutuben aarei arai auni ne nuka akiro nuiwadikatai, konye mam eong alosi aitam atiror kes, naarai amisiikit eong ebe nepetai adol apak kanu aitegear ekokoro loka ailipanakinio. Konye Edeke loebarit aitim!

Luipu kotoma kayesi kane atibong na, apotu imurok kopalutu yes. Ejaas itunga luiboiete kane kotoma oicolongo luka ikadekak, aticepak mam tikelomutu kinga naka nen. Ejaas kesi nen kanu asalakin kwangin. Ice kotoma kakesi, ilejekekasi koponesio luegelegela, ngul (mam ti epedorete) mam ti epedosi alomun kotoma, emamei eipone lo tikelomuniata kesi kinga. Konye Edeke, loebarit kotoma aitimiKe, ainaki alucet. Mam ingeri ngin. Kijau ngin. Ejaas itunga kinga ngina kede ationis naka atau, ejaas itunga luka engoti, lumam imurok epedorete aswamaikin idiobore. Adaun ijo amun, emamei aigange, kotoma akwap kana.]

52 Konye Edeke, loebarit kotoma aitimiKe, ejuku kwap Emoyo Lokalaunan, ido ejai nepene cut kwape kwana kanu aitogogong Akirot, kanu aitogogong ebe Nges ngopengol bian, lolo, ka ikar kere. Biai erai naarai ibusakinit oni? Erai naarai ebarit Edeke kotoma aitimiKe! Amen. Kwana erai Ngol, ngol nges Etunganan, erai Ejakait Yesu. Mam Nges etwanit, konye ajaru okatwak, ido ejari apaarasia kere.

Ngesi ngopengol bian, lolo, ka ikar kere, eroko ebarit aitim kwape araar neejai aberu naka alele naka aokot. Kosodi ngin alosit aitor atukos. Ido amamei amun kanuke, apotu imurok kiswamatos kere nuapedorete aswam. Ajaatar ngesi ationis naka alele naka aokot. Ajai ngin atwanare. Kosodi atiror atwele naka Ejakait. Abu Edeke loebarit aitim kibelokin kosodi alimokin nges ekejautene. Kosodete aitangaleun nges aketionis naka alele naka aokot.

Mot, abu amalayat kolot atan apak adiopet, aokun akipi. Amamei amun. Arengearitai nges kama ejaas abekono, kama ejaas itunga, mam akeijar ajok. Kosodi ngin aomoom ebe, "Inyobodo ajokis naka atamit? Arengeari eong, emamei bobo ibore ideikina eong." Konye abu kosesen, kokuju kosiep, arai kosiep loka atan, ido ajai Etunganan Loaboie kangina Loabu kolimok nges akekiro kere nueswamator, Edeke loebarit kotoma aitimike.

Edeke ngopengol, atibong na, eroko ebarit kotoma aitimike kwape ajaar kotoma apaarasia kangun. Edeke loebarit. [Aibosit naemamei ibore kateepu-Ekewa.]

53 Aomit eong ebe ijaatar oni akaadin nuka ailipanakinio akwataarei kane, arai nuinyarat oni kotoma akwataarei. Ilosi oni aiworo kes kosodete ainakin itunga aibwo okokoro. Ilosi oni ailipanakin kes.

Konye eroko oni kiswama ngun, ebe aticepak kojaas lutetiak, konyoutu awai kama ejaas ikerep. Mam na erai aikerepikit. Erai atodiaret naka aisumunet naka Edeke. Elomuni kotoma obore yenimoot ijo. Ajokis naejai toma otunganan edio. Emamei agogong kaneejai idiotunganan. Konye kwape ikeyuunak ijaatar apedor; mere agogong, konye apedor.

Abu icetunganan kengit eong, pac, ebal, "Onac Branham, iyuunit ijo ebe ijaatar oni agogong naka aswam nu?"

Abu eong atema ebe, amameitor eong agogong, cut, konye kijaar eong apedor." Nginiyuunan ejaatar ngin. Arai kinger ijo ngin, isalakini ijo neijai ijo. Konye arai kicam ijo ngin, ebuni aswam nuipu noi kabaraara, naarai ebarit Edeke kotoma aitimike.

54 Koany ber ijo epolisit loebwoi kane korot, ikenapen ikajasi bala ekotosi acakun awai akuanake, esenyit ngesi noi. Iriunit akopiirake akeki kwap. Kosodi ngesi alosit ngina neponitotor imotokan kokwap kangina korot, ekerete amairon akaisakany kotoma osawa ediopet, apedor nairwanatai kede naka asigiria irwan akwatauni ejai tomake. Emameitor ngesi agogong naka aitobwoun egaali da. Abeit ngin. Konye kinyek ber ijo nges okutak epirigi ngol kosodi aikeun akan ngin kuju, kosodi aanyun ibureekin ilulukinete. Emameitor nges agogong, konye ejaatar apedor. Eibuga kere ajei kauke.

Ido ekiliokit arai aberu, mam eong apodo ejautene loijai ijo toma, ijaatar ijo apedor naka Edeke, kanuka aisumunet, naarai ebarit Ngesi ido esumunikit aswam nuipu noi kabaraara. "Arai kilimokinet erongat lo ebe, 'koukor,' komam ibunokin kotaukon, konye iyuunite ebe nuilim ijo itodolikinok, idumuni nuilipit." Imameitor ijo agogong, konye ijaatar ijo apedor.

Kiitutu neabu Ngesi kolimokina eong kokau kangina, ebe, "Ibuni ijo apedor amisiikin aomisio nuka itauon." Naarai Nges...Kiitunitos yesi ngun, luipu kotoma kayesi itunga luka Phoenix? Abu kisumunikite ngin. Nuisumunikit Ngesi, iswamai.

55 Kwana ejaas ice kotoma kayesi ne luimameitor akaadin nuka ailipanakinio, ido emamei abunokin. Imwaasi ai edekasi ido komameitor akaadin nuka ailipakinio, ikeutu akusikanin kuju? Abeit. Eebo. Arai ikoto ijo ajenun, mere apedor...mere agogong, konye apedor naka Akivot, 'Iboro lueswamai Eong, iswamaete yesi da."

Abu Yesu kisumunikite, kotoma Luka 17:30, ebe naperoko Abunoreke, abuni ajaun apak bala naka Musa...arai Noa, "Neanyamatar ka aimat, ka amanyio; ido mam apotu kojenu koton apaaran nakelomaria Noa ataker." Abala ebe abuni ajaun apak ngin. Abala da bobo ebe, "Kwape ajaar kotoma apaarasia nuka Lot," kosodi atemar, "epote nu aiswamaun kotoma apak kangin nakepukorere Okoku loka etunganan, nakepukorere Okoku loka etunganan kotoma apaarasia nukawasia."

56 Kwana koany nuabu Ngesi, eipone loabu Okoku loka etunganan kopukoror kotoma otunganane loka Emalaika kalo, loarai Okoku loka etunganan. Abeit cut. Abu Aburaam konyara Ngol ebe, "Elohim." Arai Ngesi Okoku loka etunganan, abu kopukor eroko akwap naka Imo icwara. Eipone ali abu Ngesi kiswama ngin? Neejai ikeyuunan. Neejai ekeyuunan loka esoswai abu kijuka ikalimonokinak iarei ngina alimonokin neejaas ngul. Konye neejai ekeyuunan lokabeit, abu kobwo kibelokinite Ekepur owema, kosodi atemar, "Aburaam." Arai ngesi Abram apak...apaarasia adis eroko, ngun. Konye kwana erai ngesi Aburaam. "Aibo ejai akoniberu, Sara?"

Ebala, ejai owema, loejai kauKon."

Ebala, "Alosi Eong aidar aisumuneteKa mamakon. Alosi eong aipejokin ijo."

Oo, arai Aburaam loka apolou naka ikar akwatat, ido arai Sara akaisakanyaongon; konye Edeke,

loebarit aitim, abu kidar aisumuneteKe. Abu koyangau ikoku, 'naarai itimono Edeke, ido ileleba Nges aitim. Ebarit aitim. Idarit Ngesi aisumuneteKe.

57 Komisiik, kede Ekepur ibelokina owema, abu Sara kokieni kosodi atemar "Ikwaikinete nu ai iswamaunos? Amojong eong. Eyalamikin kereka bobo eong ka ejakaitika, kwape atumunan naedukokina? Inyobo, erai ngesi ikar akwatat lokapolou. Eidicanekosi loka okal abu konangak ikar luipu noi, noi, kau. Ikwaikinete nu ai?" Kokieni kanuka ngun?

Kosodi Emalaika lo...Okoku loka etunganan kede Ekepur ibelokina neajai e-ewema, kotema atiar, "Inyobo ketekien Sara, kobala ebe, 'Ikwaikinete nu ai?'"

Inyobo arai ngin? Abala Yesu, kotoma Luka 17:30, ebe, "Kotoma apaarasia bala kwape ajaar kotoma apaarasia nuka Lot," ejautene ngopengol, eroko icwaera atur naka Imo, ebala ebe, "epukor Okoku loka etunganan kotoma apak kangin." Abu kijaik aisumunet, nabu Malaki 4 kisumunik oni ebe abuni alimun. Abuni Aisiraret atakanun naebuni ainyakar itunga kau toma Aisiraret nakageunet nako Pentekosit, ido kede arereng ngipengin najaatar kwi kotoma apaaran kangin naka...Inyobo ngin? Erai emorukalet loka abebenoka aarei, Aitutuket Nakitetet ka Namojong, abukun aisukunetake nepepe, nuka Edeke, aitodolikin aisumuneta nuka Obaibuli nuabeit ngin aswam. Amen.

58 Edeke, loebarit aitim, mam apedori ajalakin itungaKe alomar kinga toma odiinione lo, "loebarit ajokisio ka iboro luka akwap," Atur naka Ekanisa loka Laodikia, konye abuni Ngesi aiswamaun ewai loka aiku. Kiiitutu ngin, itunga. Kisirereng Edeke yes. Amen. Edeke loebarit aitim! Atimesia nuka Edeke, ngin bon nges ibore yenemiela eong. Mere Akedolit, mere Ekekisil; konye Akeitim nges eworoi eong. Edeke kitimoi eong. Kijaatar oni kere eipud ngol.

Ajai eong asesen. Ejai aberu naiboie kokinga kangina kangeset naka eicolong. Ijo ijaatar akaadi naka ailipakinio kokinga kangina, amucalat? Imameotor ijo. Ber eong etodik ijo ebe abarit Edeke aitim. Ibu ijo kojai itapasuna kane ipak kau, biai mam? Erono noi, ido eyatakisi akonikonye amunaar erono noi. Biai mam ngin erai abeit? Edolit ngin. Kwana elosete ngun aijulakin. Edeke, loebarit aitimKe, kanuka ailip ijo arai ipedori ijo aiyuun na. Kwana imameotor ijo akaadi nailipakinio, imameotor ijo idiobore; konye mam ijo ipuda ngin. Itei ijo, erai asianut naeinkinitai nekon.

59 Eboie ekesa loedit loiboie cut kanen koingaren, kede eipone loka e...iboie cut kokinga kangina. Edeka ngesi ibore yenepoloi kotoma akuanake. Abu kolom pac kanen, pac. Ngin mam erai abeit, lokapolon? Mam ijo ijeni nuerai ibore ngin. Itukurianit ijo ngin. Edolit ngin. Amusungut nges ayangauni ngin, biai mam arai kwangin? Ijo ijaatar akaadi naka ailipakinio? Imameotor ijo akaadi naka ailipakinio. Mam ijo ipuda adio. Edeke loebarit kotoma aitimaKe!

Oo, onac, kiyu Edeke! Mam ibuonokin Nges. Kiyu Nges! Edolit ngin.

Eboie etunganan kane, esuuti loomuge, konapite agalibitin. Kongolia lailo, lokapolon. Ijo iyuunit? Ebarit Edeke kotoma aitimiKe. Iboie ijo kanen kede ania. Ijo iyuunit ebe epedori Edeke aitangaleun ania ngin kosodi aitangaleun ijo? Loiboie cut kane kangeset naka eicolong, koseseni eong. Arai kiyuunit ijo ebe epedori Edeke aitangaleun ania, iswamaikini ijo Edeke ngun arai icamunit ijo ngin. Ijo iyuunit ngin? Ijo icamuni ngin? Ejok. Idumuni ijo ngin arai kiyu ijo ngin, kitimoi. Eebo, lokapolon.

60 Ejai amucalat ne kiboie kokinga kane, edeka ngesi amamus alosit ejok naka iboro kotoma akuan. Konye arai kiyu ngesi, itangaleuni Edeke nges, arai kiyu ngesi. Eyuunit eong ebe elosi ngesi atwanian ationis ngin, cut kwape idiobore kere. Kodum ijo aitimio, nges akailipa. Apedori eong asesen kawarawar naka aberu...Amucalat Riley, ijo iyuunit ebe epedori Edeke aitangaleun amamus alosit ejok naka iboro kotoma akuan? Arai ipedori ijo, aijaun ngin! Amen. Kiyu aiyuun bon. Ejok Edeke, mam tape, Stella? Eebo. Edolit ngin. Mam eong aanyunitor aberu ngin kotoma ajaraka. Konye, Edeke, kotoma aitimiKe!

Iboie aceberu kane, naiboie cut kokau kangina, kau cut, koseseni eong. Ngesi, da, ejaatar ngesi da amamus alosit ejok naka iboro kotoma akuan. Aoomoi ngesi nuikamunitos ngin osawa kangol. Mam eong aanyunitor aberu ngin kotoma ajaraka. Kwape eraar ebe ajaatar aberu nace ya ibore ngipengin, kongolia eong. Ijo iyuunit eong araut enabiKe, arai ebulesitiKe? Ijaatar da bobo ijo ationis naka etau. Arai erai ngin abeit, ikeu akonikan kuju. Imameotor kwana ijo ngin. Edeke, loebarit kotoma aitimiKe, itodunit ebe ejari Ngesi kane kotoma aduketait atibong na. Edeke loebarit kotoma aitimiKe! Amen.

61 Epedori kereka kojai, imwaasi ai ikadiakanarak ka luibironoro luipedorete aibwo kakejenekus, kosodi atemar, "Edeke loebarit kotoma aitimiKe, kitimoi eong"? Konyoutu aibwo kakejenekus. Elipakini eong yesi, arai kiyuunit ijo ebe ekoto Ngesi...ikoto ijo aitimio kwape kwana. Kisirereng Edeke ijo. Kisirereng Edeke ijo. Kisirereng Edeke ijo, ijo. Loibiroro, Onyou aibwo kakejenekon. Edeke loebarit kotoma aitimiKe! Ijo-ijo...

Abeit cut mam yesi ikimingikinitos noi, kotoma ojautene kalo, tetere mam ipedorete aanyun ebe aisumunet ngin ngipengin naka esawa. Abeit cut mam yesi irapiara noi kotoma odiini, ka iboro ice, tetere mam ipedorete aanyun erai na aisumunet naka esawa, Edeke loebarit aitim.

Kere yenabu ijo korai, yenabu konyou kobwo, alosi eong ailip ipak edit. Akoto eong ijo alosit ekonirot neejai ecekanisa loka Eijiri loileleba kosodi-kosodi-kosodi aibatisaun kotoma aibatisao naka Ikristayon, Koinak ijo Edeke Emoyo Lokalaunan.

62 Biai ejai ice yenebuni anyoun aibwo kakejenekon, kosodi atemar, "Eong, akoto eong aitunio. Edeke, kotoma aitimiKon, kiitunai eong. Mam eong ajarit kwape kabeitor. Aticepak...?" Kisirereng Edeke ijo, amucalat. Ido kisirereng Edeke ijo. Kisirereng Edeke ijo. Kisirereng Edeke ijo. Kisirereng Edeke ijo. Edolit ngin. "Edeke, loebarit kotoma aitimiKe, kitimoi eong." Kisirereng Edeke ijo, inac. Ejai kereka...

Imwaasi bo ai ice kotoma kane, etemarete ebe, "Abuni eong aibwo. Akoto eong Edeke ajenun ebe epuda eong aitimio. Mam eong ajarit ejok. Ajar eong koipone kalo ka ngol. Ekeunun eong kuju abongonori kwap, konye akoto eong aitimiKe." Kisirereng Edeke ijo, onac. Icetunganan bobo, kotema ebe, "Edeke loebarit kotoma aitimiKe!" Kisirereng Edeke ijo, inac. Kisirereng Edeke ijo, inac. Edolit ngin. Edeke loebarit kotoma aitimiKe! Kisirereng Edeke ijo, da. Kisirereng Edeke ijo kokau kangina. Eseseni Edeke ijo. Kobwo kakejeneke.

Ibala ijo ebe, "Iswamai kereka ngin adiojokis, Onac Branham?" Cut noi. Konyou ber ijo aibwo kosodi aanyun eipone loitegelikinar ngin noi.

Arai cut teni imunokina ijo kotoma kotaukon, Edeke loebarit aitim. "Mam Nges ekoto idiotunganan omudiar, konye ebe kodolokisi kere toma aitoronokin." Edeke loebarit kotoma aitimiKe! Edeke kitimoi isio.

63 Kwana imwaasi bo ai kotoma kane kwana, luedakitos akaadin ngun nuka ailip? Eraas bo ngun anyoeka? A arai bo B, biai mam araas? A ka B. Itunga kere luejataatar akaadin nuka ailipakinio A kobwoata kosiep kalo, kosodete luejaas akaadin nuka B aibwo kokaukec.

Mam eong ajeni arai ejaas icejaanakinak ne luipudas aingarakin eong. Arai ejaas, okotosi abunore kuju, abuni eong aiyalamikin ajaun kede aingangekus kane, naarai ibuni aiyalamikin ailip, ido ailip-aailip kede yesi.

Nu, abala Ebaibuli ebe, "Etupanakinete aanyuneta nu ngul luyunete." Eebo, lokapolon. "Kokirorika irenganarete ajokin ineras kede angejepa nutetiak." Ijo iswamat ngun? Kanuka asianut naka Edeke; mere oni, konye Edeke loebarit aitim kanu aidarit Akekirot. Edeke!

Kwana, iicolongo luikokorere ikadekak, arai ikotosi yesi aibwaikin ngul cut kwap ngaren; ibuni oni ailipanakin kes cut kanepokane, mam ebuni ayangaikin oni arianar kes aitoritor nen, akidingos ngin kere kanen. Kinyek, eebo, kopotu kesi cut kuju ne. Ibuni cut ailipakin kes, nginidiopet kaoni. Edeke loebarit kotoma aitimiKe!

64 Yesi ti kibwoata ber koteten-akan nakoteten kwana, kanuka adakikan adis? Biai abu Onac Brown koupuna kayes? [Kobongokin onac ebe, "Ebuni moi."-Ekewa.] Ebuni moi. Ajai eong-eong-eong amun ebe ebuni ngesi ajaun ne. Aibo ejai, aibo ejai Onac Outlaw, aibo ejai Onac Fuller? Ice kotoma otunga kangul luajaas kuju ne kede eong neagea eong abunore nasodit, abongutu ber oni. Iitunitos yesi ikokoron ngul luka ailipanakinio lumojong, neiminar oni aibwo kanen kiton yesi aigangit eong kosiep ediopet, kosodi icetunganan kosiep loce, amina aipas eong noi?

Imwaasi ai ejaunar toma airiamununeta ngun kokau cut kageunet? Kongolia lailo. Kiitunitos yesi kau ngina, abu eong alimok yesi ebe abu Ejakait Yesu kalimok eong ebe, arai araun eong lomunot, ebe apote iboro lu aiswamaun. Biai edolit ngin? Mam oni kipou kijaatar kwape kangun kotoma apak ngin. Konye abu kiswamaun, naarai ebarit Edeke kotoma aitimiKe, ido erimarit aisumuneteKe. Amen! Atamit eong ajalakin ido mam eong apedorit. Amen! Kituritete Edeke! Aleluia! "Oo, eyalama eong noi ebe arai eong idiopet kakesi! Amen. Oo, ikatunga!

Ejaas itunga nepetai nginiboisit,
Luelikanete ikecetaun
Kede Akim nabu kodou ko Pentekosit,
Naabu kitesega kosodi aitalaun ngul;
Oo, enokie kwana kotoma otauka,
Oo, aibuses kojai Okirorike!
Eyalama eong noi ebe apedori eong alimun ebe arai idiopet kakesi.

65 Oo, eong, loelwaritoy, loitimitoy, lokican, kwape abu eong araar; ido kwana kanuka aitimiKe, Akebarit, apedori eong asesen Ajakanut naka Edeke etakani. Amen. Ibusiak bo lolo AicorakinetaKe biai!

Kobwo cut kalailo, onaceka, kotoma obeelaikon. Arai mam ijo ipedori anyoun, mamace, kobwo cut kanepokane, ibuni isio kwap cut kasodete ailipakin ijo.

Ido kwana luka akaadin nuka ailipakinio nuka A ka B, kobwoata kalaije kosiep kaje, ido ilosi isio ailipanakin kes.

Inacan lujaanakinak, ijo cut, arai iyuunit ijo aidokonokino naka akanin neejaas luedekas, kobua lailo kosodete aibwo keong kolutaari kalo. Ilosi oni ailipanakin lukadekak.

66 Kwana neiyaas yesi itunga luibwoete kokokoro kangol, arai ipedori ijo aiyuun ebe ejai Ajakut naka Edeke ne, ebe ejai Emoyo Lokalaunan akidingosiwok kwana, kiswamai cut bec nuabala ebe ebuni aswam. Korai ti eong ajaatar agogong naka aitangaleun ijo, abeit cut ti eong eswama ngun. Korai eong ajaatar eceipone loka aitangaleun ijo, ti eong abeit cut keswama ngun. Amameotor eong ngin. Eong...Ainaki Edeke ainakinet.

Mam eong arai ekalimonokinan noi noi. Amameotor eong asioman nailosikina kanu aibecokin araut ekalimonokinan, nuenyaritai ebe ekalimonokinan kotoma apakio kanu, neeraar-neeraar aijen naibusakinit korai aijen naka asioman akiro nuka ediini, ido ekoto kojaatar ediguri loka doctor, kaceda. Mam cut abeit eong ebecokin kanuka ngun. Konye Edeke, eseseni ekatau, ido ejeni ebe akoto eong aswam icebore kanuKe, akoto eong aisialamikin ngin.

67 Abu etunganan kalimok eong apaaran ya, ebala, "Aomit eong bala irai ijo etunganan lokajokan, Ejakait Branham, konye eyuunit eong ebe imunoono jo kama ejai ibore yenibucara. Ijai ijo kere kinga naka akot. Ijeni kereka ijo ebe iponio ijo atubokin awasia?"

Kasodi eong atemar, "Koany, akoto eong alimokin ijo icebore. Alosi eong alimokin ijo ebe ijo-ebe ipedori ijo kodolite, alimun ngin kanu bon apeget. Arai ebucarit eong, naeyuunit eong-eong ebe mam; konye korai ti eong ebucarite, kasodi eong ajenun kwape kwana ebe alosi eong aijar adolore ikar akwatat lukapolou, ido kobeite Nges atubokin eong kangeset naka erot, kosodi alimokin eong ebe, 'Mam ibusakinit ijo abunore toma Akujuka, William Branham. Korwa kinga toma amuton.' Ijeni ijo inyo? Ti eong ejaanak Nges ajaraka kere kiton nealosio eong, kwape kwangin. Naarai adum eong arerengusio nuipu noi numam ebusakinit eong, ebe erai Ngesi aijar naepol noi neajai eong. Erai Ngesi nginibore kere yeni...

68 Ido kere nuarai eong, kere nuapedori eong amun araun, alemunit eong kama ejai asianutuKe ka aitim. Abu eong arai ekadiakanaran, loitimitoi, lokican, emuduk; konye kanuka asianut ketangaleu Ngesi eong, ido agogong kwana eong ido angalei, kanuka asianut naka Edeke. Kijaar aikweny nakajokan naka akonye. Anyami eong, amasi, kijaar idiobore yenepuda. Mam Ngesi esumunikit ainanakin akakot; konye ikapudesia.

Ido arai kerengear Ngesi eong awai kapak kangin, ido ajeni eong...mam eong apedori asesen neabuni eong ajaun. Konye arai ajen eong ebe adiakarit eong, ido aseu eong Edeke araut loadiakari abuni eong akot asalakin arai loadiakarit, naarai ebe akoto eong aswam Akekot. Erai ebe, amina eong Nges kiton neakotor eong Akekot iswamaun. Kwana, erai ngin alimunit naati, konye amuno eong ebe imisiikini ijo ngin koipone kangol, emoyo loalimunit eong ngin kotoma. Itei ijo, akoto eong aswam Akekot. Kelip Nges icebore acepak, kijangaki Ngesi Akekou ebe, "mam," alakar eong noi kanuka ngun kwape tikalakaror eong kelimu Ngesi ebe "eebo." Naarai, ibusakinit duc oni ailip ebe "Kiswamaun akoteKon." Etema Ngesi mam eputosi bala... Arai erai ngin Akekot, eputosi kwape...Kere ejok adepar Nges atemar eebo, arai mam erai Akekot aswam ngin. Erai nen neiminar ijo Nges teni abeit. Amen.

69 Ageu eong einer nuikamunito Nges, mam eong apedori abwoun. Oo, erai Ngesi ibore ilopet, erai ibore ilopet neajai eong! Ipapero, Ngesi nges nuarai eong kere, kere nuabuni eong araun, kere nuamuno eong araun, kere esipokinitai toma Kristo Yesu, Akekot.

Eyalama eong noi kanuka ajenanut naka Emoyo Lokalaunan, kanuk Aisiraret. Ajeni eong aticepak, epedorete ice amamus acamun Ngin, konye kwape kalimokinit eong yes, aenikina eong neejai epelu loka Aisiraret. Abu aanyunet kobu, ido mam Edeke ijukuni aanyunet kanu bon aitodun ebe erai Ngesi Edeke. Ejai duc Aisiraret, Eporoto atupakin aanyunet. Idiotunganan kere ejeni ngun.

Abu Yesu kobu kede aanyuneta ka nukaumokin. Arai Ngesi Etunganan lokaumokin nakeswama Ngesi aanyuneta ka nukaumokin, konye neageunia Ngesi aiboikin kwap kosodi ageun ayangaun Aisiraret, "Eong kede Papaka irai Ipe," oo, ikatunga, arai ngin adiakaret neejaas ngul. Ianyu? Konye ajai Eporoto atupakin aanyunet.

70 Aponi Musa koinakinai aanyuneta aarei, ido nginianyunet ajaatar keporoto. Edolit ngin. Alimonokit eong nuikamunit ngin kane acepak kau, kanenice, nuka, Eporoto Loka Aanyunet. Ibusakinit kojaatar Eporoto loka aanyunet. Mam ijulakina. Apak kere erai kwangin. Arai mam erai, akepolou mam do ebunit kama ejai Edeke.

Arai elomu etunganan kede aijaanakin naitegelikina naegelara, naejai toma Obaibuli kwape araut Abeit, kosodi etunganan asalakin ejai toma aisisianakin ngipengin namojong naka odiini, kimurwok ngin. Emamei ibore kanen! Mam Edeke iswamai ibore kwape kangin. Ibore ngin, erai ngol emanu loebosit loejaatar ikok tomake arai esipirian arai idiobore kere yenikoto ijo anyara nges, anyoun ikar akaisaongon, akaisakany kau, oroko itamit ainyam emanu ngol lomojong loabu kodou ikar kau. Ido idwe luka Isirael korotokec, adounenei emanu loitetet ngini kuar. Edolit ngin, mam ijo ipedori aingada ngol.

Mam oni ijari kotoma atur ace natubor. Ijai oni ainyam Emanu lokitetet, Emanu loitetet loebunit

kotoma Akuj, kotoma osapaaliwok kwape kilosio ngaren.

Ketulurwoto awokokwes kwap kwana.

71 Ejakait Edeke, irai ijo ibore ilopet, ajakutuKon. Aomoomoi eong nuka asianut, Ejakait. Isio-isio aanyun Ijo napena iswamai iboro luipu noi! Kipup da Ijo inera kede angajepa, asesen Ijo ijuli ngin, kotoma otungakon. Wu Edeke, aanyun Ijo itangali lukadekak, kipukonori akonye nuka imudukiok, kitonyouni ingwalasik, ikimingiok aipup, ibubui einer, irai bo lolo Ijo Edeke lokaukin ido lokapedor biai!

Kosodi do aanyun ebe isumunikit Ijo kotoma apaarasia nukawasia. Karaida kijaatar isio aitupuseta nuipu nuka akuan, konye kitodiaritos bon ebe ejai Edeke elopet, nenice, locut erai abeit. Ido elipit eong Papa lokotoma Akuj, atibong na, ebe iraun isio luijeni Edeke noi tetere ianyuni ebe ijai Ijo ne.

Ido itunga lukotoma okokoro, nakitoroto okokoro lo, Ejakait...naarai iswamai isio nu naarai, ebe apotu isio kesumunikisi kes. Ido ibala Ijo ebe, "Etupanakinete aanyuneta nu ngul luiyuunete."

Ejaas ne inac lujaanakinak ebwoiete kane, itunga luisekunit Ijo, eroko epesikina akwap, araut lueraas kesi atibong na. Ibu Ijo ojeni, eroko ejauna akwap, ebe apote kesi aibwo kane atibong na, naarai irai loemamei ageunet arai esange.

72 Aso ilipi isio, Papa lokotoma Akuj, atibong na, ebe itunga lu luedekasi, luengwalangwalauna, imudukiok, ingwalasik, lueridakit engoti, idiobore kere, luitorete okokoro lo, komisiikisi kesi ebe Edeke ngopengol loejeni aiyeiyea naka itauon itangaleuni kes, arai bon ecamutu kesi ngin, aanyun bon ka amisiikin.

Etunganan loangoliari emun loka aisinit kwape bon esasedoti...atutubet naka aisinit, mam cut ngol angaleuni, naarai amameotor ngesi amisiikin naka loarai ngol.

Ido lolo, Ejakait, kwape kwangin. Arai esesenata kesi ainakinete, aomoom ngin kwape naepedori aingarakin kes, emameotor do kesi amisiikin. Erai kotoma atodiario naka Ajakut naka Edeke loejai ne kanu aitangal. Koinakinai ngin, Papa. Kiswamaun ngin, Kokiror loka Yesu. Amen.

73 Akoto eong ekaraman apiano, arai ebuni ngesi, ekiliokit arai aberu, idiotunganan kere, alosit ngina kosodi aboliaikin ekosio lo, "Eapie Emuron lokapolon kwana, Yesu loepodokinit," arai epedori ngesi, neejai ikaraman apiano kere. Kwana erai ngol...

Eitunit eong adiopet kotoma aijaanakinete nusa nuka aitangal, Fort Wayne, Indiana. Ipese yenididi yenika odiini loenyaritai Mennonite, nges abolia apiano "Eapie Emuron lokapolon kwana, Yesu loepodokinit." Aponi koyangaunai ikoku yenididi neajai eong kolutaari, angwalangwalauna. Ido nape ajai eong alipakin ikoku ngin, abu kosomar kakaninika kosodi akerit airimun elutaari. Abu totoke iilor. Abu tataake ocaka etaabala kuju, kogeuni aimony.

Kosodi ipese yenika odiini loka Mennonite kwana, komam ejeni idiobore yenikamunit Pentekosit, naarai alomunit ngesi kokanisa loka Mennonite; konye ajai ngesi airam. Apotu iketim luaojak kodoutu kwap; abu konyou kotoma Omoyo kosodi ageun awoere kotoma angajepa namam ejenas, kosodi e...ido kede ainapakina naka ekosio kangol. Kosodi aruo naka apiano alosit kuju ka kwap, eboliai, "Eapie Emuron lokapolon kwana, Yesu loepodokinit." Amen! Ngesi ngopengol bian, lolo, ka ikar kere.

74 Kwana kelipa kwana kwape...Kwana kilip nginitunganan kere kokinga kangina. Yesi itunga luiponitos kokokoro, nakidokonokina isio akanin mamakus, kiitutut, bala Yesu ebe, "Arai kiyu ijo, ingaleuni ijo." Ijo iyuunit ngin? Kwana awooto kwana.

Eyapie Emuron lokapolon kwana,
 Yesu loepodokinit,
 Elimonokini Ngesi...(Agolokisi awokokonye kwana kwape kiwoio)... itauon alakanar,
 Oo, kopupokisi eporoto loka Yesu.
 Akiror naejijim kakere kotoma okosio loka iserapin,
 Ekiror loejijim kakere kotoma angajep naka itunga,
 Loijijima kakere...(Papa Edeke, kolot kotoma otunga kwana)...loewoitere
 Wu Yesu, Yesu loisirerengitai.
 "Lokapolon..."

Kwana kwape kiponiata yesi kwana, ejai Ngesi ne. Koyanga akakiror, arai kiyu ijo ngin ijo ilopet, ejai Ngesi ne. Nginitunganan ejai ailip kokinga kangina kanukus itunga.

75 [Kilipanakinete Onac Branham kede ijaanakinak lukadekak kingarenikite Onac Borders atukos kotoma awoere. Aibosit naemamei ibore kateepu-Ekewa.]

Ejakait, eyuunit eong; Wu Ejakait eyuunit eong;
 Epedoros iboro kere, Wu Ejakait, eyuunit eong.

Kere luiyuunito, ikeu akonikan kwana, kotema, "Eyuunit eong." [Kotemari atukos ebe, "Eyuunit

eong.”-Ekewa.]

Iboie etunganan kane. Apolou naekunyaritor eong; enera, ejai ngesi atwanare kede engoti. Ejai ngesi toma oicolong lo. Emamei ediopone kotoma akwap kanuka etunganan lo aijar kinga naka Edeke. Ejaatar ngesi engoti adaun akoik kere, ido elosi atwanare arai mam erai aitim naka Edeke. Ido korai ti eong apedori...[Aiboisit naemamei ibore kateepu- Ekewa.]...akirot naka aisinyikokin neejai etunganan lo.

Ijo, ijani ijo ebe emamei ibore yenedeporete imurok aswam kanukon kwana. Idepa ijo nen, itei ijo. Ido ijai ijo...Ijaatar bon ijo arereng adiopet, ido ngin nges Kristo, itei ijo. Ido onac, ijo...abuni eong da atwanare apak adiopet. Ejaun ijo alosit, arai kidareu Yesu. Ejai eong airiamun kajo ngina, aibwo kangina kotoma Aigalisit naka etube. Ido akuar na...

76 Ijeni ijo, bala kwape etelevisio, ekamu etelevisio ebe apak ngipengin naijangakina oni karaida ibikoritiwok, idiobore, ejaas ikamitai. Nginirot nailimuni oni, ekamunitai. Kwana, itei ijo, ketogogong etelevisio ngun. Kwana mam etelevisio iswamai aputosia, itebeikini bon ngesi ikwamin ngul neejai etelevisio. Itei ijo, mam iswamai ngun. Ajai etelevisio neabu Adam kolosio kotoma akwap, ajai etelevisio apak nabu-nabu Musa kobunio Angolol Nakarengan, ajai etelevisio neajaar Eliya Moru Karamel, itei ijo, konye apotu kesi kwana kongicutu ngol. Ianyu? Ido kwana nginiboisit kere na...

Kanginikunyakit naiswamauni oni, kanginiruo, ejai abolia akiro nuepote airiamakin kede oni otube. Nginiunikinet naiswamauni oni ejai airiamun kaoni ngina. Ejai eong abongonokin kanuka nginirot naalimokini eong yes, kwape ejaanakinan. Ejai eong aswam ngun, naarai imarakini Edeke eong ngun.

77 Kwana korai ti eong apedori, ti eong etangaleu ijo; 'naarai ijaatar ijo apak naedit bon, arai mam erai kanuka Edeke. Kwana, abu eong kasodi ailipakin ijo, kere nuajeni eong aswam. Onac, idiobore kotoma akwap ti eong eswama kanuka etunganan kangol loiboie kangina kotoma ojutene kangol, ti eong eswama.

Ido ber eong kelip ijo, itei ijo. Idaunitai ijo-ijo-ijo aitangaleun, naarai abala Yesu ebe abu ijo odau. Itei ijo, "Ikemacarin kes kitangaleunete oni." Kwana korai ijo kopedori, kotoma aidules naka etaukon, acamun ngun, mam ijo itwani kwape kwana, konye ijari ijo.

Kwana, itei ijo, kwana ijani oni ebe ejai etelevisio toma agoola na. Ijeni oni ngun. Mam oni iseseni ngol. Mam oni ipedori aanyun ngol, mam awokokonye iswamatai kwangin, mam apupetawok epedorete aikamun ngol. Eyangaikini apupetai naiswamaunitai, arai idiobore yenerai ngin, yeniliacai kanu aikamun ngin.

Aso ejai Edeke. Mam oni ipedori aanyun Nges, konye ijani oni ebe ejai Ngesi ne. Yesu Kristo ngopengol. Koany, abu Ngesi kitejenaar, eipone loiswama Nges. Kwana, kanuimunitos aitangal, korai tikobwoi Ngesi kane kwana, tikiswama nuipu kanukon, itei ijo, konye mere icebore. Korai tikobwoi

Okoku loka etunganan kane, nada ejai Ngesi, ejai Ngesi ne, konye mam ti Ngesi epedo aswam idiobore kanukon, naarai adau Ngesi aitejenaar kane. Ianyu? Ido ejai Ngesi ne kwape kwana, kwape kwangin, kanu aitangaleun ijo ka aitojokaar ijo.

78 Ido abu amucalat ngin kalimok eong, kobala ebe, "Abu jo ingit arereng, kosodi aidwar arai icebore mama ajai ngin," ebe abuni ngesi adumun ikoku, naiboie koicolong loka ikadekak. Ido abu kiswamaun, abu kodum ikekoku.

Ido kwana amucalat ngin naiboie kane. Kwana ngin kodum ajengio naka ibore yenelungurikit iporotoi (goiter), kosodi aitonokok nges. Eebo, iseseni oni iboro lu luipu iswamasi. Kwana, inac, ajani eong ebe irai ijo Akristayot nakabeit. Inyobo ainakina Edeke ijo iboikin ngina, mam eong ajani. Eyuunit eong, aticepak, erai naarai ijaatar ijo...Aiyuun, itamit ijo-ijo ajaut kede aiyuun, alomun kinga naka nen, itei ijo; konye kwana koany, atamata ber oni ajaun kede ngin, erai bon ajaun kede ngin kwana, itei ijo, ilosi oni-oni ajaun ngina. Kes ngun kere nuejaas kanuka ngin, elosi ageun kwape kwana, ido ilosi oni angaleun. Ido yesi itunga kokinga kangina kotoma oicolongo kangul, inyobo, arai-arai idiobore yenirai ijo kere, kiitu ebe ejai Kristo ne.

79 Kwana ibala ijo ebe, "Biai ejai kereka icetunganan, yesi isesenete akaput ejai abunore?" Oo, eebo.

Karaida Akiro nuka Yesu Kristo, nuabu Ngesi kiner neajaar Ngesi ne toma akwap, ejai atubor cut kotoma agoola kana. Mam ngin etwani. Imwaasi bo ai ejenete ebe erai ngin abeit kotoma akiro nuka science? [Kotemari atukos, "Amen."-Ekewa.] Eebo, inyobo ngin? Kolemuni do Emoyo Akirot ngin naiwadikatai, kosodi ainakin Ngini aitodiar. Oo, aibuses!

Ejai Ngesi ne. Ejai Ngesi ne kwana, Ejakait. Oni...Kianyu oni nuipu noi, eswama Ngesi nuipu noi, kiton nekisubitor oni bala, ijani ijo, isubit bala iguikin kotoma ngin. Korai ti oni apedorete amisiikin, mere bon icebore aibe ace, acekirot naka ediini; konye aitogogonget ebe esumunikit Ngesi ebe abuni aitejenun kotoma apak kana, kane ejai Ngesi alimor ngin cut kane koingarenewok kwape kwana. Eumokina bo lolu

ibore yen biai! Mam kereka ngin eumokina? [Kotemari atukos ebe, "Amen."-Ekewa.]

80 Kwana iyuunit ijo. Ijo iyuuni ngin? Aiyuun ebe mam jo ilosi atwanare. Ilosi ijo aijar, ido ilosi ijo ainakin Edeke ayongio. Ilosi ijo ainakin Edeke ayongio. Ijo kibatisatere anyoun kageunet? Irai ijo Ekristayot, ijo irai? Ido irai ijo Ekristayot. Eebo, ikoto ijo aijar kanuka ainakin Edeke aibuses. Aso kolot kojar, onaceka. Kokirok loka Yesu Kristo!

Ido, inac, ikoto jo alosit kanuka aibuses naka Edeke, kosodi aidar ikonikoku; aso kolot do, inac, Kokiror loka Yesu Kristo!

Yesi, nginidiopet kayesi, iswamata ngupengun, Kokiror loka Yesu Kristo! Mam imurwokini Eoteri lo loka owai loka Oto kane atibong na, Ajakut naka Edeke itodiara kane. Mam Nges eyongit itunga. Ekoto bon Ngesi yes aiyuun. Yes iyuunit Nges kwana? [Kotemari atukos ebe, "Amen."-Ekewa.] Amen. Kisirereng Edeke yes.

Ketulurwoto awokokwes kwana. Mam eong ajeni ingaibo aseutu kesi, kanu-kanu aitwar. Onac Mushegian kane, kobua cut lailo, onac. Elosi ngesi atwar kotoma ailip. Kisirereng Edeke yes.



www.messagehub.info

Nuelimonokinit

William Marrion Branham

"... toma apaarasia nuka eporoto..." Apuk. 10:7